

塞原府志卷三十六

人物三

金

曩振字拯之太原人承安二年進士累官遼州刺史充
宣差從宜都提控治遼深得衆心興定三年遙授中都
副留守權元帥左都監行河東北路元帥府事招降太
原東山二百餘村遷老幼於山寨得壯士七十分駐營
柵防護秋穫四年請升樂平縣爲臯州壽陽縣西張寨
爲晉州從之封晉陽公河東北路皆隸焉奏調協孟州
提控伯德安事遣近臣慰諭又奏武仙所統境土甚大
雖與林州元帥府共招撫之乞更選本土州縣官重其
職任同與安集可使還定宣宗用其策又薦葭州刺史

古里甲蒲察行嵐管等州元帥府事從之元光元年惟
良得罪名還奏惟良在林州政尚寬厚大得民心今茲
被名軍民遮路泣畱乞遣還林州爲便不許又上書乞
遣前平章政事膏鼎行省河北諸公府帥府並聽節制
詔諭百姓使知不忘遺黎之意然後并力恢復不報復
奏河朔百姓引領南望臣再四請於樞府但以會合府
兵爲言公府雖號分封力實單弱且不相統攝所在被
兵朝廷不卽遣兵復河北人心將以爲舉河朔而棄之
甚非計也朝廷不能用

趙益太原人讀書肄業元兵入鳩合土豪保聚山峽屢戰
有功晉陽公郭文振駐兵榆次重原寨遂率衆收復太
原夜登城斬馘甚衆獲老幼二萬餘口馬仗不可計授

太原治中復擢同知府事兼招撫使元光元年八月元兵攻城甚急知不可支乃焚府庫殺妻子沉符印於井遂自殺贈銀青榮祿大夫河東北路宣撫使仍求其子孫

段德祥陽曲人慈祥樂易遇事果敢金主聞其賢召至奇其狀貌授定襄縣主簿兼本縣尉

劉海興州人舉進士第一人仕至河南府尹死於國難子孫遂家河南焉

元

郝拔都太原人善騎射通譯語太祖遣使宋徃返數四以辨稱從侵宋以功拜宣德等五路萬戶後還治太原凡遠道租稅過重者悉除之卒追封冀國公子天益天舉

天澤皆至總管

張德輝字耀卿冀寧交城人少力學數舉於鄉及北渡史天澤辟經歷官從南征時軍士逃者必戮德輝言太過止配令穴城光州下萁山民結寨德輝曰鄉民爲自保計當曉以禍福果相繼來降世祖在潛邸召見問曰孔子歿已久今其性安在對曰聖人與天地終始無往不在殿下能行聖人之道性卽在是矣又問或云遼以釋廢金以儒亡有諸對曰遼事臣未敢知金季乃所親睹宰執皆武弁世爵間用一二儒臣及論軍國大計又不使預聞大抵以儒進者三十之一然則金之淪亡自有任其咎者儒何與焉又問祖宗法度德輝指銀槃喻曰當求謹厚者司掌乃永爲寶用又問農家對曰農桑天

下之本衣食所從出今男耕女織終歲勤苦而親民之
吏復橫歛以盡之則民鮮有不凍餒者矣問孔子廟食
禮對曰尊崇與否於聖人無所損益特以見時君崇儒
重道之意耳又問典兵宰民對曰莫如更遺宗室之賢
如口溫不花者使掌兵權勲舊如忽都虎者使主民政
則天下均受賜矣及將還又陳先務七事曰敦孝友擇
人才察下情貴兼聽親君子信賞罰節用度切直多所
開悟尋與元裕北覲請世祖爲儒教大宗師世祖悅受
之因啟累朝有旨蠲儒戶兵賦卽令行之仍命提調正
定學校世祖初命官撫河東擊豪強黜贓吏均賦役者
耄不遠千里來謁曰六十年不復見此太平官府矣河
東徭役官吏率賦一征十乃闕實戶編均其等第出納

有法汾晉地廣官司守吏結爲朋黨得姦贓尤甚者數十人械庭下數其罪惡杖黜之所部肅然考績爲十路最陞見命疏所急務條四事曰嚴保舉以取人材給俸祿以養廉吏易世官而遷都邑正刑罰而勿屢赦帝嘉納焉遷東平路宣慰使奏免遠輸豆粟二十萬斛同知寶合丁議官賦蠶絲令民稅而後輸德輝曰是誣上以毒下也且輸納後期之責孰任之遂罷其事至元三年召叅議中書省事五年擢侍御史辭請老命舉任風憲者疏烏古倫眞張邦彥徒單公履張家張肅李鑿張昉曹椿年西方賓周止高遠民王博文劉郁孫汝楫王暉胡祇通周砥李謙魏初鄭辰凡二十人德輝剛直博學有經濟器性不喜笑與元裕李治游封龍山時人號

爲龍山三老卒年八十

怯烈西域人世居太原由中書驛史從賽典赤爲雲南行省幕官諸洞欵附嘗頒詔於緬緬王稽顙仕至資善大夫雲南行中書省左丞大德四年卒

郝佑字君輔小字朶魯別台由宿衛補官仁宗時拜殿中侍御史以廉直著名被知遇遷陝西行省叅知政事拜陝西行御史臺侍御史子忠恕詳文苑

王守誠陽曲人泰定初進士由秘書郎累官禮部尙書與修三史至正間使四川薦賢直枉爲諸道最進行省左丞卒諡文昭所著有文集

劉濬字濟川興州人金狀元海曾孫由廉訪司書吏調連江縣寧善鄉巡檢至正十三年江西賊帥王善寇閩官

軍守羅源縣與連江接壤。濬妻正定史氏有才識，謂濬曰：「事急矣，可聚兵以捍一方。」於是盡出奩中物募壯士百餘，命仲子健將之。浹旬，聞衆至，數萬賊尋破羅源，分兩道攻福州。濬拒之，辰山三戰三捷，俄福州陷，衆多潰。濬獨率健兵進，遇賊於中麻，突其陣，斬前鋒五人。賊兵大至，鏖戰三時，頃濬中矢，墮馬。健下馬掖之，胛被獲。濬戟手大罵賊，縛濬塔下，生斫手一指，罵彌厲，再斫一指，亦如之。指且盡，斫兩腕，次及兩足。濬色不少變，罵聲猶不絕。遂割其喉舌而死。健亦以死拒賊，善義之。舍健使殮濬屍，健歸請兵於帥以復讐，弗聽。健盡散家貲，結死士百人，詐爲工商流丐。賊中夜半發火，大譟，賊驚擾，自相屠戮。健手斬殺父者，張破四弁，擒善及寇首陳伯。

祥來獻磔之贈濬福建行省檢校官授健古田縣尹官
爲濬立祠福州北門外歲時致祭

馮純陽曲人舉進士爲河南行省平章後封魏國公子思
溫累官彰德路總管後封晉國公思溫子本翰林檢討
皆能世其家云

馮恩陽曲人通經籍敦行誼蒞官廉明善理冤抑累官御
史中丞集賢院大學士

郭周崙嵐人官義勇軍萬戶遇歲饑發庫賑貸多所全活
超授本州防禦使賜金牌克官差提控再進鎮國上將
軍鎮遠節度使兼嵐州管內觀察使河東北路關外六
州都元帥

武祺太谷人以儒進歷知安慶路柵城縣事發奸摘伏果

斷如神淮西廉訪司與安慶路交章舉荐歷省部臺二十餘年官至甘肅行省參政妻王氏罵寇死節

杜克溫太谷人上都巡警院使有没入男女奏許令配偶有古杜母之謠歷官銅鐵冶提舉使

武簡如太谷人性寬厚任大理評事議獄多仁恕終開州刺史

高福太谷人龍虎衛上將軍有戰功

侯洪字有容太原人舉進士初爲離石判官進尹榆次廉直無私遇事立決雖簿書纖悉不遺

明

郝鵬徐溝人洪武中以貢授戶部檢校游歷湖廣參政入爲戶部右侍郎晉南京戶部尙書性儉樸官卿貳猶衣

大布衣所居廳事亦前爲諸生所處也恭謹自飭言動不苟中外皆有能聲當世羣以公輔推之

范斌榆次人永樂甲午解元知陝西華州性仁恕撫字得宜不畏強禦有犯必懲後以憂去民赴闕保畱加叅議俸復知華州卒於官

張旗榆次人永樂時知安邱縣會妖賊唐賽兒等攻安邱旗與縣丞馬撝率民兵八百以死拒戰賊敗復集衆攻城會徯青兵至旗出城中兵合擊大敗之卒全安邱事聞擢山東叅政

周瑄字廷玉陽曲人由宣德乙卯鄉舉入國學正統中除刑部主事善治獄北征當扈從者多托疾瑄請行遂被劾歸擢署郎中校尉受賕縱盜以仇人代瑄辨雪之抵

校尉罪外郡送囚一日至八百人瑄慮其觸熱三日決遣殆盡景泰元年以尙書王直薦超拜刑部右侍郎賑順天河間饑英宗復辟遍歷所部大舉荒政先後賑饑民二十六萬五千給牛種各萬餘奏行利民八事還朝轉左門達達臬數興大獄瑄委曲開諭多所救正復飭諸郎毋避禍以故不至冤濫官刑部久屬吏不敢欺成化改元遷右都御史督理南京糧儲捕懲作奸者數輩宿弊爲清言鳳陽淮徐饑獲發廩四十萬以賑久之遷南京刑部尙書令事不須勘者毋出五日獄無滯囚暑疫悉遣輕繫者曰名汝則至囚歡呼去無失期爲尙書九載屢乞休久乃得請家無田園卜居南京卒贈太子少保諡莊懿長子經次子紘成化進士爲南京吏科給

事中兩以災異言事並嘉納閱軍爲中官蔣琮誣奏貶
南京光祿署丞終山東叅議

王永壽字延齡太原人正統間以舉人任饒州府推官擢
廣西道監察御史嘗從北征凱還受賚巡按山東貴州
蘇松等處累升工部尙書巡撫湖廣兼督軍務征銅鼓
五關等苗有功賜從一品俸天順初調南京卒於官賜
葬祭

古鏞祁縣人正統丙辰進士選翰林院庶吉士授大理寺
評事出爲山東僉事治河張秋遷本省按察使召補大
理寺卿鏞深經術有幹濟材初官東觀以文章有名後
涖臬司晉廷評平反冤獄比張秋之功尤鉅先是河決
時患且及京師鏞至相其形勢而疏鑿之不數月遂就

大原府志 卷三十六
故道今卽其地立祠祀焉

王福字崇善清源人幼穎異喜讀書正統戊午舉鄉試第一入國學祭酒李時勉深器重之乙丑成進士授監察御史照刷陝西三司文券遷順天府府丞轉府尹以幹濟稱值內艱遣官諭祭營葬事甫畢卽奪情復任力辭不獲在京兆十餘年彈治姦猾嘗自爲贊當世謂爲實錄焉

江洪字朝宗其先合肥人祖浩爲太原左衛指揮僉事子孫世襲因家焉洪少以才勇知名善騎射能任人與士卒同甘苦宣德未選總京營左翼升署都指揮僉事仍守山西英宗十四年也嘗犯邊上率六師親征失利洪奮勇護乘輿與其弟子四人並死之

魏恭交城人景泰庚午舉人授陝西渭南知縣調河南新安有爭訟者屢歲不決恭至一訊卽服獲盜乃自責曰此吾不能以德化民致然耳他盜聞之皆改行爲善都御史王恕荐於朝升西安府通判改荊州府

王璟陽曲人景泰癸酉舉人授濟南府同知擢本府知府遷本省布政司叅政轉南京光祿寺卿璟事父母孝所得俸輒推以予昆弟居官所至俱有惠政在南都清望尤著卒贈工部侍郎

申綱陽曲人工詩文景泰癸酉舉人選監察御史有直聲出按河間等處奸貪屏迹歷知松江九江兩府家無厚產有故屬劉宇嘗餽以金峻却之後宇爲冢宰寓書臺使者月餽錢米却不受

孫榮榆次人博學工詩貧不能具饘粥處之裕如景泰癸酉舉人授華州訓導尋遷麟遊縣教諭恒以祿不逮親爲歉終身不御酒肉居官時凡四陳時政得失疏累萬餘言幾蹈禍不悔

王鑑字彥昭太原人景泰甲戌進士授御史嘗於左順門面斥中官非禮中官怒甚屬都御史蕭維楨因考察去之維楨不從天順時彗星見鑑與同官十三人將劾石亨曹吉祥給事中王鉉洩於亨亨先與吉祥泣訴上言鑑等結黨排陷明日疏入收疏首張鵬楊瑄悉召諸御史擲彈章俾自讀訖下獄榜掠遣戍會風雷雹災甚乃止貶膚施知縣有善政憲宗初所司以治行聞擢延安知府陝西守臣亦上鑑膚施政績特賜勅褒之

任義字時中榆次人博通經史尤精於易天順己卯舉人任南陽同知剗剔蠹政殆盡上清軍便宜五事著兵部條例中汝鄆饑先度地爲屋發粟以賑民至如歸以不附權貴歸講學授徒自號五雲人稱五雲先生

郝毅榆次人天順己卯舉人授鞏昌府通判剖斷如流勸勵學校以剛正忤時歸屏居別墅五十年不涉城市躬課耕桑自給年逾九十卒

周經字伯常瑄子天順四年進士改庶吉士授檢討成化中歷侍讀中允侍東宮講文華大訓太子起立拱聽閣臣議坐經與諸講官皆不可乃已孝宗立進太常少卿兼侍讀宏治二年擢禮部右侍郎中官請修黃村尼寺奉祀孝穆太后吐魯番貢獅子不由甘肅假道滿刺加

淨海至廣東經皆倡僚長爭毀其寺却貢不與通調吏部尋進左侍郎通政經歷沈祿張后姑壻也中官傳旨擢本司叅議經言非面承旨又無御札不敢奉詔時尙書王恕在告經與其疏爭之朝論避焉靈壽奸民獻地於中官李廣經倡九卿疏爭卒罪獻地者八年災異陳時政具奏草中言斥戲樂密令中官廉草奏者尙書耿裕曰疏首吏部裕實具草經曰疏草出經手卽有罪罪經世兩賢之九年代葉淇爲戶部尙書寬逋緩征裁節冗濫四方告災必覆奏蠲除每委官監稅課入多者與下考奉御趙瑄獻雄縣地爲東官莊經劾瑄違制下獄鎮撫司請勘實經復爭之乃予民中官何鼎劾外戚張鶴齡下獄經疏救之忤旨切責雍王祐檮乞衡州稅課

司及衡陽縣河泊所經言不可許納之織造中官請增給兩浙鹽課二萬引經言鹽筴佐邊不宜濫給不從經恐歲以爲常再疏請斷其後乃命歲予五千引倉場監督內官多增遣經力爭詔止設總督二人京通監督三人內靈臺請撥錦衣餘丁百人經曰祖宗設內臺其地至密今一旦增百人將來必有洩漏妄言者上悟立已之崇王見澤乞河南退灘地二十餘里經言不宜予興王祐杭乞近湖地千三百餘頃經三疏爭之竟不許時賜壽寧侯張鶴齡肅寧諸縣地四百餘頃其家人因侵民地三倍鶴齡又奏莊田加徵銀二分經抗章執奏命覆核經言地已再勘今復遣使徒滋紛擾昔太祖以劉基故減青田賦徵米五合欲使基鄉里子孫世世頌基

今興濟篤生皇后作配聖躬正宜卹民減賦俾世世戴德何乃使小民銜怨無已也勘官言地乃憲廟皇親栢權及民恒產經復諫曰東宮親王莊田徵稅自有例而鶴齡獨踰之天下謂陛下惟厚外戚不恤赤子權先帝妃家亦戚畹也名雖僨直實乃奪之天下又謂陛下惟厚椒房不念先帝世尤驕焉給事中魯昂請盡括稅役金錢輸大倉經曰不節織造賞賚齎醮土木之費乃欲括天下財給事言非是內官傳旨索燈費二萬兩持不與經剛介方正好強諫雖重忤旨不恤宦官貴戚皆憚而疾之會星變自陳乞休命賜勅馳驛歸加太子太保廷臣爭乞畱中外論薦至八十餘疏武宗初言官復薦名爲南京戶部尙書遭繼母憂三年名爲禮部尙書固

不許遣官卽其家起之至郊外復以疾辭上遣使慰
問賚玉帶強起受事數月卽謝病去五年卒年七十一
贈太保諡文端子會進士浙江右叅政

王永亨太原人受學薛瑄門後任隆慶知州著有宦績子
瓊遂於理學爲世名臣蓋淵源有自云

王瑞陽曲人成化戊子舉人知丹陽丁父憂改獻縣任丹
陽時有權勢豪橫置於法抵死獻縣有外戚奪民田以
計還之豪右斂迹

張縉字朝用陽曲人成化己丑進士授鈞州知州補滄州
遷南京工部郎中出爲杭州府知府節縮浮費省民錢
十餘萬遷山東叅政都御史劉大夏治河張秋委令調
度河左右悉被其利築南望東堤令運卒得於水漲時

分道並挽晉通政司右通政尋擢右僉都御史巡撫宣
保二府轉右副都御史巡撫宣大胥有保障績改督漕
運值歲荒奏留米十萬石賑饑人入爲戶部左侍郎晉
南京戶部尚書以不附逆瑾致仕旋復與尚書韓文同
下詔獄又以前奏請改兌爲擅更祖制除名瑾誅起補
都御史督漕如故兼勦淮南盜奏捷賜璽書褒勞已而
力請致仕得旨晉南京戶部尚書歲給夫米如故縉起
州郡洊歷臺省在滄州將去任民攀臥泣畱繼以入議
經其地歡呼迎馬首者絡繹不絕後因家焉卒年八十
三著有玉雪遺稿及奏議若干卷

陳琦字文玉清源人成化辛卯舉人

縣志載景泰丙子舉人

初判華

州斷理稱明時北兵逼西夏撫臣以琦有文武材畧選

西鳳等府民兵千人屬之遂截殺韋州拒戰紅德城擐甲胄者七日追獲人畜萬計升知安化縣再補邯鄲皆有德政云

陳璧字瑞卿陽曲人成化壬辰進士知嘉興武邑二縣以強項著擢監察御史出按山東辨太保劉珣獄轉山東副使備兵臨清爲漕運地奸弊叢生璧至裁省殆盡遷本省按察使有倚法爲奸者立治之遷南京太僕寺卿清操皜然建栖雲環山二樓攜佳客諷詠竟日有康樂香山遺風三年擢右副都御史整飭薊州邊務兼撫順永三府未幾以病告歸璧性抗直居家孝友重行誼爲御史時偶觸兄怒長跪謝過爲副史有僉事某舊與隙比卒傾囊贖之後膺節鉞遷賦遂初急流勇退其風節

尤足尙云

杜綦陽曲人成化庚子舉人授城固令升南京戶部主事時逆瑾勢傾中外凡晉秩者率厚遺謁謝綦獨不行僅數月卽奪其官瑾誅起擢員外郎言行政事多可法以年老乞歸

唐希介字景賢陽曲人成化丁未進士選庶吉士改工科給事中命稽省真定等四鎮儲備盡得宿弊以聞權倖見嫉謫四川石砭宣撫司經歷稍遷漢陰令繕修城郭庶務畢興遷知通州靖漁鹽盜修河堤民用安堵擢陝西按察司僉事督餉榆林時大學士楊一清總制邊務議增茶市以贍軍賦希介條荅便宜二十三事一清并施行之且貽書以謝改四川僉事尋擢陝西按察司副

使愛養士卒約束裨校邊境肅然軍府多贏積中官欲私取希介不可中官構諸逆瑾矯詔著致政歸年八十五卒

王瓊字德華太原人成化二十年進士授工部主事晉郎中出治漕河三年著爲志繼者按之不爽毫髮由是以敏練稱改戶部歷河南右布政使正德元年擢右副都御史治鹽兩淮入爲戶部右侍郎按銜府賜地三年轉吏部右侍郎改南京服闋補戶部右侍郎轉左八年晉尙書瓊爲人有心計爲郎時悉錄故牘條例盡得其歛散盈縮狀及爲尙書益明習國計邊帥請芻糗則屈指計某倉場痔糧草幾何諸郡歲輸邊卒歲採秋青幾何曰足矣重索妄也人益以瓊爲才十年轉兵部尙書累

加少師兼太子太師十四年宸濠反瓊請隸南和伯壽
祥督操江兵防南都南贛巡撫王守仁湖廣巡撫秦金
各率所部趨南昌應天巡撫李充嗣鎮京口淮揚巡撫
叢蘭扼儀真而上下詔親征命與楊廷和等居守先是
瓊用王守仁撫南贛假便宜提督軍務至是舉朝惴惴
瓊治兵自如大言曰諸君勿憂吾用王伯安贛州正爲
今日不過旦夕賊成擒耳果如其言尋代陸完爲吏部
尙書無何世宗入繼言官交劾瓊繫獄戍莊浪改綬德
霍韜首薦瓊嘉靖六年令還籍明年復命爲兵部尙書
兼右都御史代王憲督陝西三邊軍務土魯番將牙木
蘭沙州番帖木哥土巴胥求內附詔瓊趨肅州議之賊
獻還哈密求通貢乞歸驛畱使臣瓊奏乞撫納兵部尙

書王時中議從之瓊復上番寇肅州狀并言賊方悔禍
宜俯納其請再疏力請詔還番使通貢如故自是西域
復定而北兵侵莊浪瓊部諸將遮擊之斬數十級敵退
俄入紅城子明年侵寧夏又侵靈州瓊督遊擊梁震等
邀斬七十餘人秋集諸道精卒三萬按行塞下自寧夏
抵花馬池旌旗三百餘里不絕敵聞之徙帳遠遁諸軍
分道出縱野燒耀兵而還會給事邱九仞劉世揚御史
吳仲等劾瓊令致仕俄寢前詔遣使慰諭之時番大掠
臨洮瓊集兵曉以禍福諸番多順命惟若籠板爾諸族
不服乃討焚其巢斬首二百六十撫降七十餘族錄功
加太子太保瓊在邊戎備甚飭敵嘗入山西得利踰歲
復獵境上陽欲東瓊令備其西敵果入大敗之敵益懼

而土魯番率十國奉貢及是諸番蕩平西陲益靖十年
冬召入爲吏部尙書十一年秋卒官贈太師諡恭襄瓊
在本兵時功多而其督三邊也人以比楊一清云

郭曦字景暘榆次人成化丙午舉人授新蔡令歲稔貯粟
萬餘石賑活甚衆時流賊屠掠郡縣率民兵禦之城賴
以安秩滿民保畱仍任一年加升承直郎開州同知尋
擢河南通判

張璣文水人成化間舉人知洛南縣廉恕公勤愛民如子
秩滿百姓赴京保畱加六品俸仍知縣事聲名甲於關
西後貧不能歸里卽邑居焉

金鼎字大器榆次人篤實寬裕喜怒不見於色任道力行
常若不及成化間貢任武功訓導義貌偉容博學善教

以義理約束諸生諸生毋敢違者所著有松軒集

張梯岢嵐人成化間貢知陝西中部縣嚴慈互濟任九載終始如一歲大歉人相食賑救有方盜賊屏息升寧州知州民皆號泣不忍去

崔侃陽曲人宏治庚戌進士歷官保寧知府操守廉明政績大著府有疑獄悉得其情時流賊肆掠侃忤逆瑾得請歸田卽引衆避遁一方賴免林居三十餘年藿粥自甘杜門不出

羅賢字大用清源人宏治庚戌進士試福建道御史踰年當實授聞親計卽日就道服闋補原官巡茶陝西時茶禁久弛官茶壅滯不行疏其宿弊酌爲經久計又條上便宜十事接遼東治將帥之貪殘者不少貸一年內封

事五十餘上再按河南值鄉試得人稱盛屬吏貪婪者按實褫職中州人以閻羅稱之

陳璘字邦瑞陽曲人宏治癸丑進士授太常博士從享南郊爲孝廟所知遷監察御史巡居庸關躬歷險阨相地勢增戍兵再巡山東疏罷礦役引蔡河入曹利運道修理闕里孔廟外轉浙江僉事遷陝西苑馬少卿少師楊一清總制三邊荐授叅政督軍儲士馬皆宿飽遷河南按察使痛治豪猾倚宗室爲奸利者鎮守王太監素橫肆震其威亦奉法維謹遷右布政使轉左擢都御史巡撫湖廣以邊才改延綏廷推兵部侍郎念父母年高請終養不許武廟西巡駐蹕延綏時江彬用事張甚璘威望素著凡事持大體不詭隨彬爲斂迹未幾父母訃後

先至慟哭請終制延議駕南巡上郡重鎮非璘不能殲
歷奏令奪情候代比世廟入繼始得歸治喪事璘游歷
中外功績茂著初通籍政府授意令一來謁當授庶常
卒不往識者早見其梗槩云

閻睿字汝思祁縣人宏治己未進士授永清令縣蝗睿發
粟易蝗民捕之積萬餘石得不災旣以公事至霸州州
人願借以爲守縣人爭之訟於中丞洪洪曰閻令風憲
品豈郡縣所能畱哉尋召入永清人畱靴誌感正德辛
未流賊至郊賊首齊彥明睿舊抵禁也感睿德繫馬數
匹於門泣拜而去巡撫李毅齋寄詩曰強暴思恩曾繫
馬市民懷德願畱靴拜陝西道監察御史清甘肅諸鎮
倉糧糧多虧折官不能償睿革兜攬兌給之弊設法取

大原府志 卷三十一
三
盈釋淹滯之員六十八舊例官軍馬斃本人自賠有典
妻買馬者睿命屯地每頃出銀一錢以給營馬之用差
滿復命疏陳邊務數條悉採納之升浙江按察司副使
巡視海道豪右歛迹以疾告歸享年七十有二

薄彥徽陽曲人宏治九年進士爲南京御史論道士崔志
端不可玷尙書正德初入黨竊柄偕同官陸崑等極論
馬永成魏彬劉瑾傳興羅祥谷大用輩罪疏上而劉健
謝遷已被逐彥徽爲首復上公疏請畱健遷罪永成瑾
等悉逮下詔獄榜掠杖三十除名歸

寇儉字約之榆次人少與兄恭並爲諸生皆有聲博極羣
書雖盛暑夜分不寐宏治丙辰進士授大理寺評事陟
寺副駁覈多所平反丁內艱跣行奔葬寢食並廢憂勞

成疾卒年四十八

張天相陽曲人宏治己未進士陝西慶陽知府有循吏風民甚戴之

寇天叙字子惇榆次人由宏治辛酉鄉舉入太學與崔銑呂柟善登正德三年進士除南京大理評事進寺副累遷應天府丞武宗駐南京從官衛士十餘萬近倖多求索尹齊宗道憂卒天叙攝尹事口青衣皂帽坐堂上江彬使至好語之曰民窮官帑乏無可結歡丞專待譴耳彬使累至皆然彬亦止他權倖有求則曰俟面奏卽予中官拘妓女數百多餓死以天叙言得釋禁軍攫民物天叙募人與搏而兵部尙書喬宇選拳勇者與搏戲禁軍傷慙且畏不敢橫駕駐九月南京不大困者天叙與

宇力也嘉靖三年巡撫甘肅回賊犯山丹擒其長脫脫
木耳西域貢獅子犀牛西狗請却之不聽巡撫陝西寇
入固原擊敗之斬首百餘又討平大盜王居等累賜銀
幣歷官兵部侍郎

陳璧字德如太谷人宏治壬戌進士除行人司司副屢奉
命出使藩邸却餽遺不受遷刑部員外郎歷郎中讞獄
得情雖權貴不爲動出爲陝西左叅議會大軍勦鴟賊
以饋餉功賜彩幣銀牌遷湖廣副使奉勅整飭榔桂衝
永諸路兵備又以勦徭蠻功食從三品俸復奉勅撫治
荆襄鄖漢等流民公正廉約直指以其績上聞一年丁
艱歸遂不復出

解一經交城人宏治甲子舉人授平原知縣廉介寬仁修

學校鑄祭器遇荒捐俸以賑升南京戶部員外郎中補雲南廣西知府後乞歸隆慶間進亞中大夫壽九十六王範陽曲人正德庚午舉人授歸德知州會流賊數萬攻劫咸欲棄城去範諭以義設法調度卒保無虞有大姓梃人至死行金脫罪不受坐以法補陝州始終如一後罷官總督萬達禮聘籌邊且奏記委用辭疾歸年八十五卒

張文明字應奎陽曲人正德六年進士授行人擢御史巡按遼東尋按陝西鎮守中官廖堂貪恣捕治其爪牙二十四人堂大恨十三年車駕幸延綏文明馳疏諫極陳災異且言江彬逢惡導非亟宜行誅朝臣匡救無聞亦當罰治不肖說而文明朝行在諸權倖扈從者力裁抑

之所需多不應司禮太監張忠輩怒甚譖言諸生毆旗
校文明縱勿治命柳赴京下詔獄明年春言官交章請
宥不報比駕旋忠等屢請加罪七月命執至豹房將親
鞠文明自謂必死及見忽命釋之謫電白典史世宗立
召復故官尋出爲松江知府甫涖任卒巡按御史馬錄
頌其忠贈太常少卿

侯綸太原左衛人幼有異質嗜讀書於易學尤邃正德辛
未進士授戶部主事歷禮部郎中出爲湖廣副使伸雪
冤獄遇歲荒流離載道繪饑民圖上之得旨賑救全活
無算嘗督大工出入會計雖緇銖必慎吏不得緣爲姦
省費以巨萬計歷戶部侍郎于汝諒進士累官都御史
亦以廉敏有聲

王卿字良佐太原人正德甲戌進士令上海武宗南巡有緣爲姦利者卿悉抗不應但曰車駕過日供不供自有令民賴以安歲災設法賑濟時疫流行捐藥餌調治江藩犯順令獲罪者以鐵贖戎器乃備稀簡權倖抑遏才頑理剔冤滯終戶部主事

張四維陽曲人正德丙子舉人授荏平令邑當衝疲民逃亡過半招撫流移均隣邑館陶地糧著均田圖宿弊盡祛升彰德府同知裁抑強宗革除冗費百姓立碑思之彭希曾陽曲人正德乙卯解元授開封通判嘗署篆長葛及鄆陵在長葛則修學宮執經問難函席恒滿在鄆陵則平土寇文事武備震耀一時考第一進階奉政大夫

開封同知

李春芳字元實陽曲人正德辛巳進士授陝西整屋令資性明爽值荒歲勸富以貸貧尤善營度計長久欽取兵科給事中遷順德知府

胡體乾交城人正德辛巳進士授貴州道御史巡按山東陝西南直累遷浙江副使終河南左布政宦遊二十載絕賄賂遠權勢不置田宅致政歸與親友詩酒爲樂屢荐不起

解一貫字曾唯交城人正德十六年進士除工科給事中陳講學修德親賢孝親任相遠奸用諫謹令戒欲恤民十事世宗嘉納之嘉靖元年偕御史出覈牧馬草場太監閻洪奏遣中官一人與俱力言不可乃已還朝劾太

監谷大用李鳳奪產殃民罪由是內臣勦戚莊田字歸

之民時營后父陳萬言第力請裁節復助楊廷和爭織造皆不納歷刑科左右給事中尋進吏科給事中教授王价錄事錢子勤以考察罷假議禮希復用一貫言如此將壞祖宗百年制事竟寢張璉桂萼擊費宏一貫言璉萼平生奸險特以議禮一事偶合聖心超擢以來恃寵靈凌轢朝士與宏積怨已欲奪其位而居之苟其計得行則奸邪氣勢愈增善類中傷無已天下事將大有可慮者詔下所司璉萼等銜不已竟謫開州判官以卒

楊永清陽曲人正德間知陝西隴西縣澹泊有守遇事理解悉中肯蔡興學校繕城池嚴保甲息盜賊期年之間政事畢舉

陳經太原左衛人正德間任寧武守備敵大舉入關經奮
勇戰死贈昭勇將軍立祠祀之

韓唐太谷人性忠鯁有胆畧正德間由太學生授萊蕪縣
主簿流賊楊虎驅衆數千人來攻城聲勢洶湧唐意氣
慷慨率子子思督鄉兵拒戰殺賊數十人力盡被害贈
萊蕪縣知縣錄子思國子生後官鴻臚寺序班

王佑祁縣人性端方負經世學正德中以貢授廣昌令苗
寇亂自福建大帽山抵縣境恣焚掠佑列木爲柵驅市
人激以忠義相與效死寇破柵入猶橫刀巷戰殺數十
人被執不屈死之

王鼎岢嵐人正德中以貢授永城令負氣好義受事時流
賊趙燧等已入豫中知不免飭兵儲餉爲死守計城東

自洋河孔道也勅舟子徃來者勿渡數日有持牒者驅
徒十許人皆桎梏曰是所獲鄉導賊來寄永城獄中者
甫渡卽脫桎梏殺舟子擁二萬人至城下鼎偕主簿曲
啟訓導王景賢分城以守戒曰失守者斬鼎故善射連
仆十餘人賊不敢近日暮曲啟遁賊破城入鼎聞變急
下與賊遇持長戟力戰久之被執至死罵不絕口贈光
祿寺丞錄子爲國子生

楊渠陽曲人任西寧衛經歷調發軍興呼吸嚮應節使薦
其能擢判晉州遷東平州同有政績薦知費縣益自淬
礪下車釋逋負繫者二百餘人免租七千復業者日衆
巡行阡陌問其疾苦二稅惟所有雖尺布斗粟隻雞束
草皆得送縣輸者如流歲大熟勸富民出粟每社立倉

大原府志 卷三十一
秋歛春散稍收其息以備歲饑凡開荒地復流民補給
官牛栽桑棗立官莊撫按交章以卓異聞升濟南府通
判掌文登縣事

寇天與字子立榆次人儉子嘉靖丙戌進士授戶部主事
升員外郎中鞏昌知府調東昌性英爽蚤以文學知名
服官所至有殊譽初以部署督遼餉凡出納條格公需
程度皆所規定守東昌政務煩劇乃酌緩急關白以行
訖無所壅乙未入覲治行爲東省最忌者假封事短之
竟以廢卒

周鈇字汝威榆次人嘉靖五年進士授行人擢御史巡按
陝西邊將多殺被俘來歸民鈇請嚴禁有報降五人以
上者賞之詔可再按山東特改右春坊清紀郎兼翰林

院侍書俺答入寇鈇以中樞無籌策請早爲計責降虜
州府知事旋改國子監丞擢吏部文選主事坐與王與
齡發嚴嵩私屬事貶河間通判已而吏部擬擢南京吏
部主事嵩言鈇調官甫四月不得驟遷上詰責尙書許
讚鐫文選郎鄭曉三級鈇等褫職爲民廷臣論荐以嵩
在位不復名穆宗初贈光祿少卿

寇陽字體乾榆次人嘉靖己丑進士知廣平令著循聲升
禮部主客司主事歷升浙江僉事陝西叅議所至持廉
秉公人靡敢以私干商洛產金毫無取焉尋爲江西按
察使不阿分宜以浙江右布政落職居家以孝友聞

唐頤字子觀陽曲人希介孫嘉靖乙未進士官至臨洮知
府持已清謹居家儉約歷二千石而家業蕭然不干謁

不語時政得失循循退讓家居四十年學者稱爲東巖先生

李應時太原前衛人幼穎悟篤學強記習年名籍諸生間登嘉靖壬子鄉試謁選授兵部司務絕苞苴請托同僚嚴重之俸滿量移南京戶部員外郎甫八月致仕囊橐垂竭不能治行李賴故人爲郡守捐貲相助得歸里頽垣破屋不蔽風雨薄田不能供饘粥地方當道自公事外無私語或有餽問必公諸族人尤工詩文博學廣稽卽天文地理星相醫卜無所不究而居已恂恂與人處無衆寡小大必以誠敬以孫成名貴贈通議大夫戶部右侍郎

李希洛字宗程陽曲人嘉靖癸丑進士儻有大畧授昌

黎令時關中地震民多被傷遂移知渭南掩骼埋胔招恤流亡民建祠祀之拜戶科給事中忤相嵩歸里事兄通判希濂愛敬純篤士民婚喪不能舉者傾貲賙貸歲旱捐廩煮粥濟活頗衆所著有益言錄政學訓言錄明儒要言性理守約集夢心說

孫允中太原人嘉靖三十一年爲給事中巡視光祿寺提督中官杜泰乾沒歲巨萬少卿馬從謙奏發之泰誣從謙誹謗允中偕御史狄斯彬劾泰如從謙言詔下從謙獄以允中黨庇謫邊方雜職從謙竟杖死而泰獲宥允中後累遷應天府丞卒

趙體敬字克禮太谷人嘉靖壬戌進士授行人兩使親藩餽遺悉却升兵部主事歷員外郎中擢鳳陽知府持操

大原府志 卷三十六
三
冰蘖敷政惠和兩課俱爲諸郡最遷四川右叅政

李敏字融南榆次人丁未進士選庶吉士授刑科給事中
庚戌邊警保定楊中丞以援遲被逮敏力救之廷杖被
謫後復升禮科給事中不從醮事行香又被杖累遷至
順天府尹自陳歸里徜徉原澗別墅十餘年終

褚鈇字民威榆次人嘉靖乙丑進士授河間令畿輔近地
稱難治鈇蒞任詳而有體循聲冠三輔徵爲監察御史
遇日食上疏陳六事出按陝西茶馬藩府欲得牧地爲
湯沐邑力爭遏其請再按河南周趙二藩有醢縱爲民
害者奏治之督南畿學政累遷右僉都御史巡撫河南
疏免逋稅九萬有奇召入內臺佐院事遷大卿寺卿再
遷工部侍郎值興慈寧工庀材量費悉出手畫尋以勞

邁疾請告歸病痊起復原官改刑部侍郎中丞李材以
言事忤旨再三執奏得釋遷右都御史兼戶部侍郎晉
尚書領漕務兼撫江北淮水泛溢陵寢及漕將被患築
周家橋塞黃堍口繕完歸仁故堤陵與漕兩無害事聞
加太子少保後兩宮三殿災陳時政急務語極剴切不
報疏乞骸骨屢上始命馳驛歸卒贈少保賜祭葬如例
邱陞岢嵐人父麟正德中戰歿有忠名陞慷慨負氣節嘉
靖間以衛指揮遷北路口遊擊倭寇犯江南簡邊陲將
征之陞與焉率水陸衆並進屢戰皆捷獲賊千餘人以
功擢揚州叅將凱還過叢林遺孽數十人猝出邀其歸
路陞橫刀躍馬徑前薄之賊黨驚潰陞亦中流矢死事
聞贈都督命立廟如臯春秋祀之廕子世襲衛指揮

董綸字彝之太谷人判官文博士嘉靖間由太學生授歸德府檢校賊師尙詔作亂太守廉綸材命署巡捕事獲賊黨數人將誅之爲當事所阻不果已而夜斫門招外賊入綸手執鋤刀率姪董魁並一僮戰於衙巷妻賈氏亦執鎗以從被執與妻姪四人相對就死事聞贈歸德府同知錄子良臣爲國子監生

畢文字載道先世和州人以軍功授太原衛指揮倣儻有奇氣初署寧武所再署八角堡守備繕城訓士尋以陝西都司司罷歸撫軍王知其材辟掌中軍事後復起陝西都司陞雁門遊擊將軍禦敵東峪口俘馘有差已復誘擊蕎麥川破之爲仇者搆陷下獄適標兵變焚劫公府以巨木撞獄門邏拜文前願奉之舉大事文怒甚罵曰

若等受國恩不能効犬馬報乃欲爲滅族計耶賊進以刃迫之文益罵不休遂遇害後撫軍萬立祠北門內檄有司春秋祀之

聞大綸榆次人嘉靖間貢授安吉訓導講明正學士習不
變擢容城教諭誨士亦如安吉後以仲子樸貴封翰林
檢討大綸履行端粹父疾焚香虔禱減已壽以延父齡
兄性剛烈委曲承順時稱孝弟

魏朝宗字統元岢嵐人由貢授彰德幕府有廉幹名進知
清澗凡有利於民者悉殫力致之比歸郝光元送以詩
曰琴鶴應隨去空餘墮淚碑

李聯芳岢嵐人幼失怙恃賴庶母郭氏育之襲伯父指揮
職常以忠義自許歷官大同得勝保叅將初開馬市威

名震敵升臨洮府總兵歿於陣

戴光啟字仲升祁縣人隆慶辛未進士授會寧令省費寬
徭履畝均賦修關城擒盜首邑人立祠祀之行取給事
中請臬憲攝馬政請敵庫給關防議撫臣修問刑條例
疏太監用營馬論劉世延不守法多見採納奉命關三
邊條陳八事遷河南叅政設方畧以賑饑民招應募以
達潞府轉按察使兵備禦夏策要賞賚市之謀論兵丁
汰浮之怨督府倚賴之遷河南布政致仕葺學宮立書
院建文昌閣凡關地方事皆力爲之年七十五卒

王繼夏岢嵐人萬曆癸酉舉人授陝西寧遠令邑當通衢
供役擾攘而地多磽瘠水漲陂汙一值荒歲無復生計
民胥疲於賦役繼夏乃捐冗費禁苛取平均驛置之弊

勸農力耕覈社倉教積貯艱荒萊招流亡因山就澤聽
自利不爲禁庾橐咸以充盈於是舉鄉約申六訓延見
諸生考德問業鼓鐘間作聲詩繼之諷咏不輟又增築
隄堞鑿渠引水後世利之

馬朝陽太原人萬歷丁丑進士累官四川兵巡道征楊應
龍有功請告歸閉門課子外事盡却巡方喬允升嘗求
一面終不允後卒妻程氏守節凡四十年

萬自約太原右衛人萬歷庚辰進士授唐縣令爬搜悍黠
舊俗一變擢刑科給事中改戶科前後劾罷兩尚書兩
都御史一翰林學士出爲陝西漢中僉事潔已率屬罷
諸不切務居二年遷尚寶司少卿再遷光祿寺少卿適
倭犯朝鮮主兵事者謀以封貢款之抗疏力爭遷南京

太僕寺少卿尋以原官名還修舉馬政歷太常寺卿晉
順天府尹時大內方索珠寶自約悉與停罷坐是解組
歸

王宗賢字淑顏清源人萬歷戊戌進士授成都府推官精
心讞決獄多平反升戶部主事監督南新倉耗蠹一清
節剩以萬計改吏部主事轉考功司郎中典試中州得
士爲盛當京察時門戶角立宗賢獨持平尤陰護善類
升叅知分巡鳳平道地方賴以綏靖時督院劉重其才
偕閱塞上凡綜覈稽查皆倚辦焉以勞卒於官

王元雅太原衛人萬歷甲辰進士歷官都御史巡撫遵化
崇禎開城陷冠帶縊死於公署全家以殉三年正月巡
撫方大任言元雅有失城罪而一死節概凜然足以蓋

愆樞輔孫承宗請卹殉難諸臣亦首元雅而以大吏故
贈卹不及

李成名字寰知太原衛人萬歷三十二年進士授中書舍
人擢禮科給事中疏陳銓政失平語侵尙書趙煥又劾
方從哲并及其子恣橫狀尋移疾歸後起山東副使天
啟初遷湖廣叅政入爲太僕少卿四年春擢右僉都御
史巡撫南贛魏忠賢以成名爲趙南星所用因所屬給
由犯御諱除其名崇禎初名拜戶部右侍郎以左侍郎
專理邊餉改兵部名對平臺區畫兵事甚悉數月而罷
卒於家

關世科太原人性醇雅好學萬歷甲辰進士初任湖州府
推官清滯獄數百又疑獄數十起悉決之歲大禱捐俸

大原府志 卷三十六
三
爲倡賑之舉升戶部主事督遼儲平收放捐公費共一
千五百餘兩助餉查營伍虛耗積銀三萬餘兩報部奉
命備兵寧化值兵變棄幼子單騎出關謹斥堠繕甲兵
嚴偵探卒獲安全

鄭宗周字伯忱文水人主事之僑子幼英敏讀書西山甘
泉寺萬歷丁未成進士授鉅鹿令調唐山令擢監察御
史列首輔方從哲奸狀光廟崩復累疏李可灼崔文昇
罪出按福建首正宋李忠定公祀典廉墨吏寘於法時
閹黨熏灼惡宗周異已竄名紅丸案內將中傷之會遇
外艱不果莊烈正位起掌河南道遷太僕寺少卿發計
樞二部匿情釐遼薊諸鎮宿弊前後疏四十餘上晉正
卿擢兵部右侍郎巡撫天津遼東失守民相率徙內地

加意撫輯尋遇內艱奔歸終制不復出

王在臺字爾基文水人萬歷癸丑進士授滕縣令值海饑設法賑貸福藩內侍求昭陽湖地爲贍田力與抗拒得免入爲戶部主事遷郎中督通倉再督延儲璫禍作告歸家居四年補原官遷知漢中府政先教化有文翁遺風獨嚴治瑞藩監尉之奪民田者遷布政司叅政分守關南時流寇掠興安募兵固守先是在漢中勦賊常板子等俱有功至是名益著廷推鄖陽巡撫以病未任歸卒

尹同臯字舜鄰興縣人就湯子萬歷癸丑進士授密雲令賑饑蠲逋擢兵科給事中改工刑戶三科給事中前後疏七十餘上而錢糧京察屯田保甲諸疏議尤中時弊

遷太常寺少卿後歷僉都御史巡撫四川削平奢崇明之亂加兵部右侍郎致仕歸遭親喪廬墓六年推愛宗族拯危濟急有范文正遺風著有畏天齋實蹟撫蜀須知諸書行世

程謙字六吉岢嵐人萬歷乙卯舉人崇禎間知陝西西鄉令勤敏廉肅吏胥畏法署洋縣城固值流賊始起都邑悉遭蹂躪謙獨設法督民守禦三邑俱安堵無虞父老咸稱名杜

姚一麟陽曲人萬歷乙卯舉人授陝西中部令值崇禎初饑饉頻仍盜賊踞城廬舍灰燼民僅孑遺一麟至極意軫恤撫殘黎復縣治漸有甦機嚴明果斷吏無馘法民獲寧宇歷升漢中知府

張養字惟直榆次人父九河爲汜水令以善政聞養登萬
歷丙辰進士初授中書舍人主考山東所取皆知名士
拜御史論劾不避權貴如東江開賞糜費當舉忠魂褒
錄等疏尤爲時所推巡視淮揚鹽政潔已通商極力振
刷清出浮課二十餘萬貯公帑奸人側目誣以公費爲
私囊下刑部獄禁錮八年後得歸里卒年八十二著有
四書主意禮經獨解禮記纂言等集子天保有孝行舉
進士歷官吏部考功郎

吳用極字心銘清源人垂髫時有志陽明之學隨父任元
城問業趙高邑南星學益進及父任徽州州多礦賊出
奇計破之文名日起年十九舉萬歷戊午鄉試時邊警
屢至嘗拊髀而嘆思爲國家効力崇禎間流寇猖獗用

極居南關中日夕經營爲固圉計已而賊夜至用極仗
劍登陴血戰死關人感其忠捍禦益力卒獲保全事聞
詔以義烈旌之

成材清源人萬歷間貢知陝西宜川饑饉枕籍賊盜內訌
材恩威兼用撫綏饑民折衝外寇宜城賴以保全

武維周太谷人天啟甲子舉人知直隸大城縣政簡刑清
後以守城中流矢死贈光祿寺少卿祔祀三忠祠

戴運昌祁縣人布政光啟子少績學年四十九始領天啟
丁卯鄉薦又十年成崇禎丁丑進士初知河南尉氏令
清廉慈惠折獄以情邑有亡命聚徒數千人將爲亂潛
授方畧擒其魁斬之調良鄉縣入爲戶部員外司練餉
殫力國計旋以陳演牽連下獄後入鹿臺山中閱二十

年卒

張鳳奇陽曲人舉於鄉崇禎初爲永平知府三年正月城陷鳳奇闔門死贈光祿卿祭葬廕一子

王冠字元甫榆次人嘉靖丙午舉人選河南鹿邑令邑境有盜魁聚衆爲人害且將謀亂冠設方畧悉擒之除蠹更無敢爲奸冠在官以治狀被旌凡薦者三十有六擢靜寧州未幾卒邑人爲之立祠

左應選字六語榆次人天啟辛酉舉人授昌黎令值遼東用兵所向披靡應選獨保孤城悉力守禦四十餘日城獲全以功擢薊州僉事時宜興當國以枉法事屬應選應選不爲屈宜興銜之嗾以他事遂被逮謫戍汾州

樊子英晉府典仗官闖賊入府被執不跪睨地下一大磚

猛力提擊中賊帥幾死羣賊擁見逆闖慢罵如故賊勒殺之

陳心鏡徐溝人崇禎間由舉人任欒城令城陷心鏡自刎先是其妻王氏投繯死兩媳亦皆王氏投井死至是從死者復三十餘人欒城人爭立祠祀之

朱慎鉦代府宗室闖賊入城殺宗室憐其老欲釋之慎鉦大呼曰奈何不殺我延頸就刃而死其子霞郡庠生先於城陷時至圓通寺前投井死

朱小二寧化府宗室子闖寇太原與其妻及一妓張飲已聞城陷逼其妓縊妓少難小二卽拉殺之隨與妻投繯死

朱文衡朱長安並雲邱府宗室子闖賊陷城胥見執不屈

死之長安妻 氏及弟媳輩十餘人皆投井死

瞿通晉府儀衛司人城陷先令家人自縊遂自焚死

王德新晉府羣牧所千戶闖逆破城晉王被繫德新見之
憤甚投晉邸菊花園井死母李氏年八十亦死

司鼎前衛千戶守北城城陷語家人曰我當死汛地遂登
城被殺

劉秉鉞前衛指揮城破被執罵不絕口與右衛指揮馬負
圖同時被殺

江明北城鄉約率夫守堞賊登城衆皆潰明獨不去被殺
申鼎欽太原左衛人原任大同守備賊入城奮佩刀馳騎
殺賊二人羣賊擁至擊殺之

韓似雍太原前衛指揮守東城城陷似雍力禦死之

陳功陽曲人賊至被執不屈死之

朱敏柰字麓松晉藩宗室授龍門通判閩闖陷太原意家屬必遇害乃設父靈成服而祭既又設香案望闕拜謝粘小詞壁間有君恩難負五倫須顧語遂投繯死

陳三接文水人舉崇禎六年鄉試知河間令歲饑人相食三接至雨卽降有疑獄數年不決立判之妻武氏賢三接見封疆多故遣之歸答曰夫死忠妾死節分也十五年閏十一月殉難於巷武氏亦從之贈僉事

朱廷鄣代府宗室崇禎中爲鞏昌府通判署秦州事有廉直聲十六年冬賊陷城賊帥使跪朱叱曰我宗姓頭可斷膝不可屈賊欲活之大呼曰今日惟求一死乃見害武象乾太谷諸生固原州同知國清子國清署鎮原縣事

爲闖賊所執累置死地志益堅象乾承庭訓又時教其三子甲申闖賊至象乾與城守之役捍禦盡力城破將驅衆巷戰衆潰因歸伏臥室中冀乘間殺賊頃之一賊入手刃之連斃數人餘皆悸莫敢動亟呼其黨揭屋以入象乾被擒與三子俱死人稱三世忠義云

朱慎鏤晉府宗室攝靈邱郡王府事賊陷太原冠帶祀家廟驅家人入廟中焚之已亦投火死

任萬民陽曲人崇禎間諸生常著救時八議守城十說獻之撫按荐授城武令任三載城破死之又庠生彭鯤以父參戎振雲陣亡任百戶闖賊陷城拔刀以待格殺數人遂被害又庠生魏選奇城陷急抵家妻爲賊迫奮拔賊刀殺賊與妻同被害貢士孫禛授蒲州學正城陷投

大夏府志 卷三十六
井死舉人張景維授河南光山令未之任被執不屈賊
殺之田大治乘城陷衆潰拔刀獨畱賊問何人曰吾諸
生也專砍汝頭賊殺之

張璞徐溝人由恩貢初任縣丞升狄道知縣癸未闖賊陷
晉執璞不屈施以桁夾甲申闖敗東歸時鄉紳被執未
死者猶幽禁闖至挾璞及其妻陳氏械送西安璞與妻
同縊於西安寺中

國朝

羅爌字鏡初清源人萬歷戊午舉人授延川令時土寇披
猖所在悉被焚劫爌訓練民壯城獲保全尋守滄州

國朝順治乙酉遷戶部郎中西寧僉事甘鎮久不靜爌撫
邊民懷西羌始得晏然家居數載好善不倦邑人仰之

裴希度字晉卿陽曲人崇禎甲戌進士授堂邑令時歲荒
賊擾實心撫字民賴以安行取入京授工部主事釐奸
剔弊夙蝨一清擢御史務持大體不沾沾許人陰私賊
陷太原母投別墅葺中死希度痛念母節乃捨別墅爲
報恩寺

國朝游升太常寺卿致仕歸年六十有三卒所著有澹明
野嘯息齋藏書等集

李家選陽曲人前明丙子舉人懷慶府推官

國初授懷慶府知府單騎入太行招土寇范以忠鄭國安
等胥令復業又請豁逋賦二十餘萬民德之擢湖南道
卒

桑芸字笈雲榆次人家貧借書讀竟輒不忘崇禎己卯舉

於鄉庚辰成進士

國初補行人司行人尋擢御史巡按畿輔歷光祿寺卿復外補汝南叅政墾荒土數千頃除無藝供數千兩積獨白福德肆爲不軌廉得之將寘諸理橐千金求免大聲叱去立斃杖下遷廣西按察使桂林守兵素橫痛繩以法不少貸比入覲遷河南右布政行至南昌卒芸泄政果斷中外咸樹聲績卒後卹典獨隆

胡全才字體舜一字韜穎文水人性豪邁有方畧前明癸未進士觀政條陳禦寇機要授兵部主事贊畫李建泰軍至正定率所部百餘人對疑幟於固關寇遙望不敢進順治元年授車駕司郎中遷陝西漢羌叅議道時有賀珍之亂尤總鎮避西安全才招民兵擐鎧力戰擒斬

僞兵備宋朝美等已而川孽張定國駐保寧謀犯漢中
乃佯遣牌掃除傳舍聲音迎大軍而遣叅將嚴自明馳
擊保寧平四月賀珍自西安敗回復圍漢中立城頭堅
守月餘會援兵至城獲全擢右副都御史巡撫寧夏瀕
行猶親勦蕎麥山砦賊孫守法等殺賊一萬四千有奇
四年寧夏賊馬德猶獺李彩繼起督將士戰預望城再
戰河兒坪德死彩亦就擒後以穆遠案罷尋起補江西
饒南叅議道經畧洪承疇稔其才疏請隨征湖南旋巡
撫鄖陽時郝劉袁塔高李諸賊環師攻鄖舊撫病請歸
全才令將士由賊充斥地以進賊遁乃馳至穀城白虎
山南漳蜈蚣寨相地形列營檄諸將督兵進討會河濟
廟灘白土關之戰後先告捷賊黨始散是役也斬外降

將黃鳳昇等百人降丁羅萬兒等五百餘人救難民徐自嘉等萬餘人擢兵部右侍郎總督湖廣旋以疾卒於官贈兵部尚書諡勤毅子應麟廕入監仕至天津道僉事孫績成進士

孫世蓋字丹臺興縣貢生工文而勇精騎射順治初訓導臨縣遷垣曲教諭再遷崇仁令大盜羅漢七聚衆萬餘前令將勦之謀泄遇害世蓋至念縣人胥通盜無可共事者獨與其僕密謀之而陰厚千總孟暨鷲提胥吏乃佯爲恇怯遣人語漢七曰功令不勦盜者軍法從事今縣小無兵吾且降幸將軍至某鎮與吾面計事及期漢七率衆二千駐鎮外偕其黨吳暨校三十人入鎮世蓋設廣筵宴校廳外迎漢七暨吳於廳而徐呼千總來漢

七色變則命千總解刀勸飲飲極歡復移樽於園世蓋揮僕曰吾與將軍有密言爾曹不得聞携漢七手入園猝捧之仆地吳拔刀千總亦自後捧仆之而僕急入縛二賊乃名鷲捷胥吏授以弓弦曰吾出勸三十人酒汝伺後俟吾擲杯彼仰觀汝卽以弦扼其喉如法縛二十五人而逸五人去曰吾無兵怖之可胥走也二千人果遁明日率鄉勇搗巢則巢胥空矣事平撫按議交章薦世蓋以老力請歸卒年六十有五

原明田字我潛興縣人少有遠志喜讀書凡天文地理志河防農政等書靡不殫究順治戊子舉於鄉考授保定府刑推廉正自持吏無爲奸擢工部屯田主事陞員外出爲淮徐河道至則河決黃家嘴直灌沐陽海州等處桃

源一帶且爲魚鱉明田日夜露處率屬捨築三月而大
工竣宿遷又決捨築如前因於桃源黃家嘴并洛馬湖
徐昇壩數處皆堅築重堤置守如南岸旣報命以勞成
疾告歸卒

常大忠字二河交城人順治壬辰進士銓梓潼令調潛山
履畝清丈計畝編里俾無贏縮建三立書院買學田創
庫樓立眺臺擢保定府丞郡有楊忠愍祠朔望必往拜
重修旌忠祠建忠烈祠祀甲申盡節諸臣無何疾作肩
輿往勘完縣災自出囊金賑之越數日疾卒櫬不能行
衆賻之乃獲歸葬

閻毓偉徐溝人闖賊入晉授僞官弗受遂刳其母至陝賊
平負母還鄉刻志讀書順治辛卯壬辰聯捷授江西吉

安府推官與郡中生徒講道德課文藝士皆感化有暮
夜餽千金者力峻却之擢吏部尋出差江淮鈔關以廉
介聞丙午典試陝西尋遷刑曹臨事敬慎有疑案輒力
爭可否以驚直稱年五十餘遂致仕歸遺產悉讓弟姪
邑中有貧不能婚葬者悉以積俸給之徐土瘠多旱爲
開嘉平渠引洞澗水以灌邑人至今利之

鄭崑壁字崙輝文水人祖死於闖賊父亦殘廢崑壁奮志

讀書順治戊戌成進士銓富平令縣南漆水沮水金定
河北溫泉河胥可灌田崑壁相度高下疏支渠濱河地
胥爲沃壤編審均覈科盜捕逃井井有紀巡撫賈漢復
亟稱曰鄭尹可謂精神滿腹矣以一等行取兵部主事
同考丁未會試稱得八旋以戶部郎中出爲湖廣督學

道楚地遼瀾南北奔心以勞成疾數年卒

鄭崑璽字殿光文水人熙壬戌進士授三河令調普寧

安化所至以廉能著為吏部驗封司主事遷員外郎

中晉戶科給事中僑古寺布被紙帳澹泊如諸生論

者稱之

傅山字青主一字公他曲人祖霖山東遼海叅議父之

謨明經授徒稱離垢先生山其仲子也生而穎異讀書

十行並下善詩古文詞尤工書畫年十四補博士弟子

員十六餽於庠督學袁公深器之命讀書三立書院時

時以道學相期許後袁被誣下獄山徒步千里伏闕訟

冤由是海內無不知傅山其人者迨袁誣既自出督九

江屢遣使召山山不往字自成亂山遂棄弟子籍遊

平定祁汾間或坐深山閱釋典戶外事弗問也康熙戊午舉博學宏詞科屢辭勿獲抵都門復以老病辭特授內閣中書放歸越六年卒山居母喪臥苦枕函食粥不茹蔬者百日先人遺產爲其弟蕩費殆盡無怨色及弟歿遺孤尙幼山撫之不翅已出其天性如此及卒四方會葬者數百人所著有性史十三經字區周易音釋周禮音辨條春秋人名韻地名韻兩漢人名韻若干卷子眉亦以善書名

張旺字月宇興縣人少能挽十五石弓左右馳射束髮從軍爲廣東將軍何某所知授千總時吳耿構逆題授守備援漳州府復永定縣十五年從征尙逆粵城內砲火烟飛弩石蝟集衆錯愕莫敢先登旺持短刃大呼先登

城埤賊披靡我軍乘之城遂破奉調入閩勦山海擒渠寇陞福建右營遊擊復龍虎山暨長泰縣諸地隍池十九年大徵甲士海上而軍門不習水師諸將亦不克舍騎從舟旺獨率支軍復十九寨暨海澄隍池又平金門廈門諸島陞左都督給拖沙喇哈番歷陞福建水師提督四十一年勦廣東八排明年又勦湖廣紅苗卒贈太子少保祭葬如例

溫而厲徐溝拔貢姜逆之變山賊四起被繫至太原而厲直言正氣以大義責之竟禮而歸衆服其膽識後仕山東荏平縣丞開墾荒田百餘頃以修河功升江南句容令時軍務叢集嘗於馬上判事邑人頌爲神君卒於官高士達郡庠生己丑姜瓖叛委署平遙令蒞任七日城陷

被執賊勒授僞職不從遇害

王廷衡陽曲人武解元任都司營中軍姜賊據晉祠廷衡繕火具攻之不克自焚死祀忠烈祠

張占鰲太原人康熙三年由拔貢任荊州府通判西山李亨亂占鰲運糧遇賊不屈死之

張成功徐溝人康熙間以千總隨征雲南苗蠻負固不服成功力戰被賊斷臂墜馬死事聞封義勇將軍子緯蔭授雲南千總

成元震字東權文水人父性江南守備元震生而瑰異康熙戊子舉於鄉授守備陞河標右營遊擊調常州常之宜荆臨太湖素稱盜藪元震夜乘小舟督諸哨船分巡各港漢擒其魁商旅以安遷江南叅將轉副將會總督

楊超曾欲撥營馬協濟驛務集兩司議將決元震力持
不可超曾色變兩司數目元震元震不爲動翌日超曾
意解乃止有以蜚語誣南昌鎮者制府將劾奏以元震
代元震爭之獲免其守正不阿類如此陞山東總兵母
憂服闋除江西總兵調河州鎮州故番漢雜處好鬪有
司聽理不平輒興大獄元震飭番漢各治其人始安堵
晉甘肅提督畜牧蕃庶番人有竊馬者其酋素服謝罪
元震諭以中朝威信咸懼伏準夷聞之亦相戒無敢犯
旋坐事左遷廣東總兵改授兗州外艱服闋補江西總
兵以年老乞歸卒子邦彥乾隆丁卯舉人東昌府同知
汝舟江寧府知府邦直乾隆庚午舉人汾州府教授

孫嘉淦字錫公興縣人康熙癸巳成進士改庶吉士授編

修母憂歸雍正元年起補原官陞國子監司業以直言
極諫稱三年視學安徽四年遷祭酒調直隸學政差竣
還任先是嘉淦爲司業時曾以人才出於學校而科目
僅取文藝無裨實用宜令天下學政選拔諸生貢太學
九卿保奏經明行修者任助教學正等官以經術造就
之至是復上言別置學舍支帑金爲膏火資乃

命戶部歲給銀六十兩賜學南官房三百餘間外艱歸起補
順天府尹署工部侍郎十年遷刑部侍郎奏對不稱
旨逮獄擬罪旋釋之署河東鹽政今

上登極授戶部侍郎晉左都御史上三習一弊書乾隆六
年遷刑部尙書二年總理國子監事務時承楊文定公
後執經者數千人嘉淦奏倣文定經義治事二齋法砥

礪刮磨咸知 賀學三年轉吏部尚書授直隸總督直隸
旗民雜處雖 稱難治嘉淦蒞任凡賑饑通運開河捕蝗
諸事次第興 舉其尤著者晉州小兒被殺村民紀懷讓
誣服獄既且 嘉淦奏請覆審寃得以白環京皆旗園地
奸民往往益 租奪佃嘉淦酌定租值奪佃之風遂息其
明敏果毅類 如此五年移制湖廣八年調撫福建尋罷
九年起授宗 人府府丞遷左副都御史十二年乞休歸
十四年復授 副都御史遷兵部侍郎晉工部尚書十七
年晉吏部尚 書協辦大學士事務明年卒諡曰文定嘉
淦生平以誠 居心以敬立學貴賤不以動其心夷險不
以易其操大 約得力於克己復禮之學居多學者稱爲
懿齋先生所 著有詩經補註易傳補義近思錄輯要若

干卷子孝愉由廩生官至直隸按察使

鄭士俊字灼三文水人雍正癸卯舉人少醇謹事父及繼母以孝聞以經義教授弟子十餘年多所成就由莞庫遷桐廬令桐濱大江秋水驟溢俊募漁舟救援全活無算開倉賑粥計口給米或懼專擅獲戾俊曰與其民死而官無恙孰若活民而失官乎上官如所請邑有盜客金者其父發之復有殺人者其父亦縛以獻民不忍欺多類此調慈谿被議降開封府經歷卒年七十七

王志曾字欣沂陽曲人雍正乙卯拔貢選授山東莘縣知縣調諸城撫卹士庶不恤勞勩歲饑力請於上截漕數萬全活甚衆因徵解未完落職子雲成進士澤州教授

李如蘭字長芳 嗣次人徙居陽曲以貢授澤州訓導例改
主簿奏對稱

旨超擢高郵州知州居九月陞紹興府知府調江寧府知府

江寧人民稠雜豪猾爲奸如蘭命捕之杖殺數人而將

軍所轄兵素慕悍如蘭豫請於將軍一繩以法陞江南

廬鳳道晉四川按察使所至察吏安民悉心籌畫自懷

遠至壽州湖港交通久爲盜藪徃徃藉捕魚爲業搶劫

行旅如蘭廉得其實戮渠魁數人而自某地至某地若

千船皆有編號又復增塘汛立保甲盜患遂息成都華

陽爲四川附省縣舊責以領銀納米給兵餉百姓苦之

如蘭言於巡撫與外州縣均而民困以甦乾隆八年轉

江西按察使雨蒞事值歲祲流民數萬集會城如蘭請

截漕十萬賑之全活甚衆及其去也百姓扶老携幼哭送於道晉四川布政使卒丁未培辛未進士廣西左江道永祺甲子舉人四川松茂道孫履謙廣西潯州府知府

楊二酉字學山太原人雍正癸丑進士改庶吉士授編修以工書入直每進一帙輒拜文綺之賜陞貴州道監察御史巡視臺灣請建書院免臺屬積逋臺之民比戶戶祝焉尋陞工科給事中轉兵科掌印給事中奏停採買減關稅除耗羨又論浙中兵餉銀色粵中土豪虐民等事疏上皆報可以年老乞歸年七十六卒

李全陽曲人雍正八年以行伍出征西番屢著勞績洊陞雲南永順總兵將軍明瑞保任提督乾隆三十三年正

月隨征緬匪連奪數寨緬匪率衆猝至全奮勇當先身
中鳥鎗而死崇祀昭忠祠葬祭如禮子萬年廕襲騎都
尉又一雲騎尉補授四川遊擊征金川有功歷陞廣西
右江鎮總兵

李璋字琳瑯陽曲人乾隆丙辰武進士初任湖廣守備辦
理金川軍務著有勞績調宜章接壤粵東甲戌夏河水
漲溢璋晝夜堵禦城賴以全陞湖北施南都司施南苦
旱璋祈雨跪籠洞中雨暘著石處皆傷霖雨露足軍民
歡頌陞湖南遊擊廣西叅將右江總兵會緬匪不靖辦
滇省軍需有勞績加軍功授武顯大夫

張凌霞太谷人乾隆丁巳武進士第二授二等侍衛出任
福建督標右營叅將擢中軍副將破建寧賊魏現等十

五年擢雲南開化鎮總兵十八年坐事罷二十二年隨定邊將軍兆惠擊賊有功委署守備十月大兵進勦波羅泥都霍集自阿克蘇直搗葉爾羌凌霞爭先衝擊逆徇率賊二萬人猝至凌霞力戰身負重創沒於陣事聞祭葬如例崇祀昭忠祠子爾清廕襲衛千總

陳聖矩字子儀太谷人乾隆己未武進士授湖廣守備陞永綏都司四川遊擊三十七年金川不靖隨大軍進勦駐守堯磧屢立戰功小金川平調守馬爾達三十八年大營兵潰賊騎掩至聖矩且戰且守閱七日賊來益衆家僕王金印死之聖矩身被十餘鎗力不能支同其次子禮自焚死事聞給祭葬崇祀昭忠祠孫德文廕襲守

備

牛天昇字罄宜太谷人乾隆壬戌武進士授三等侍衛十三年推授江西興國營都司歷陞廣東將軍標遊擊湖北德安營叅將調任撫標中軍陞湖南寶慶協副將湖北襄陽鎮總兵三十六年母憂服闋補四川川北鎮總兵隨征金川由木坪進兵攻克甲金達時賊衆分據要害天昇偵得蒲松岡一徑可通督兵越險六日而深入其地賊驚走三十七年春克達圍乘勝據木耳寨日隆關至巴朗山與大軍會旋分兵從南山梁進卷甲疾趨連克碉卡數處遂破斯當安寨又破日耳寨斷賊糧道秋七月直逼頭卡克之諸賊皆堅壁增壘雲梯地道俱無所施天昇懸賞數百金獲敢死士百人日夜奔擊遂破二卡取木蘭壩殺賊無算由降燈碉蒙古寨進攻八

卦寨與諸路官兵會賊僧格桑遁餘皆望風納款三十八年春分兵進勦控喀以破南北山梁大小由厰崇德澤耳脚礮卡數十處小金川平夏五月陞授貴州提督屯控喀大營屯木果木與天畀相爲掎角六月大營兵潰天畀方食聞變投箸而起卽將印信付所親馳送督臣而自率騎赴援賊軍已大至天畀躍馬直前士卒從之自辰至未殊死戰天畀身受重創馬忽蹶猶手殺十餘人而死事聞奉

旨照旗員例議卹諡毅節圖像

紫光閣功臣之次崇祀照忠祠長子敬一

欽賜舉人次子敬憲廕襲騎都尉又一雲騎尉補授山陰

路都司

馬全初名琛字具堂陽曲人父雲翹陝西守備調金川叅將卒於師全生而奇偉有智畧能左右射乾隆壬申鄉會聯捷登進士第三授二等侍衛出爲福建撫標遊擊旋與同官忤罷乃復去京師投巡捕軍大學士傅忠勇公恆奇之仍命就試改今名已卯庚辰復聯捷登進士第一授頭等侍衛出爲江西南昌鎮總兵尋調崇明鎮總兵海外有羊山爲奸宄出沒之所全巡查嚴密奸宄潛遁一日舟行海上大風折艫衆相顧失色全仰天祝曰馬全奉

天子命蒞此土有負此心明神殛之士卒何罪視畢風遂息三十四年陞江南提督三十五年自請往金川効力加領隊大臣五日至控略卽殺賊二百餘級旋奪礮卡

十餘處時大軍屯木里木方爲進取計賊騎忽至全隊
躍馬橫戈直前殺賊賊騎圍之數重矢石交集麾下士
皆盡全身被重傷猶力戰死時六月十日也事聞祭葬
如例諡莊節崇祀昭忠祠陰子國銳世襲騎都尉又一
雲騎尉除授都司

邢天培徐溝人乾隆甲戌武進士歷任四川茂州營都司
乾隆三十七年領兵征金川三十八年六月陣亡崇祀
昭忠祠孫清和廕襲千總

周玉隆陽曲人父某爲甘肅武弁遂家焉玉隆貌不魁梧
而武勇絕倫以行伍擢北總大將軍兆惠征伊犁玉隆
從常以爭先陷陣屢立奇勲會官軍屯山上賊悉銳扼
我師衆軍懼玉隆持槍直入中堅縱橫衝擊一槍恒貫

三四人槍起尸墮復大呼殺賊所向披靡賊膽落官兵乘之賊大潰所擊殺凡千數百人日暮收兵玉隆爲殿有賊騎尾之玉隆聞馬蹄聲急迴顧槍已及腰側身避之賊忽墮脇下乃一手扼其項一手挈其膂橫置鞍上比還而賊肋已斷矣兆惠見之大喜呼爲巴圖魯軍中以比常山趙順平云陞守備尋晉都司卒玉隆所用鎗二一長二丈重三十餘斤鋒六尺許下作八稜稜脊皆有刃一長丈四尺重二十餘斤鋒長三尺餘制並同又一精鐵簡長三尺餘橫插腰間戰酣則掣以擊敵當之者無不糜爛故所著功獨多而撮其大畧如此長子某亦以驍勇聞年二十餘歿於陣

文苑附

二百

郭琦字公偉晉陽人少方直有雅量博學善五行作天文志五行傳注穀梁京氏易百卷鄉人王游等皆就琦學武帝欲以琦爲佐著作郎問琦族人尙書郭彰彰素疾琦答云不識上曰若如卿言烏丸家兒能事卿卽堪爲郎矣遂決意用之趙王倫又欲用琦琦曰我已爲武帝吏不容復爲今世吏終身處於家

王修字敬仁小字荀子濛之子也明秀有美稱善隸書號曰流奕清舉年十二作賢人論濛示劉惔惔曰此論便足參微言起家著作郎琅邪王文學轉中軍司馬未拜年二十四臨終嘆曰無愧古人年與之齊矣

郭澄之字仲靜陽曲人少有才思機敏兼人調補尚書郎
出爲南康相宋高祖引爲相國叅軍從北伐克長安更
欲西伐集寮屬議多不同次問澄之不答但西向誦王
粲詩曰南登霸陵岸回首望長安高祖意遂定曰當與
卿共登霸陵岸耳因還澄之位至相國從事中郎封南
豐侯卒於官所著文集行於世

北魏

閔湛太原人爲著作令史崔浩薦有著作之才拜中書博
士後與浩同被難

王遵業瓊長子風儀清秀涉歷經史位著作佐郎與司徒
左長史崔鴻同撰起居注遷右軍將軍兼散騎常侍慰
勞蠕蠕乃詣代京采拾遺文以補起居所闕與崔光安

豐王延明等叅定服章及光爲孝明講孝經遵業預講
延明錄義並應詔作釋奠侍宴詩時人語曰英英濟濟
王家兄弟轉司徒左長史黃門郎監典儀注與中書令
陳郡袁翻尙書琅琊王誦並領黃門郎號曰三哲時政
歸門下世謂侍中黃門爲小宰相而遵業從容恬素若
處邱園嘗著穿角履好事者多毀新履以學之以胡太
后臨朝謀避地自求徐州太后曰王誦罷幽州始作黃
門卿何乃欲徐州也更待一二年當有好處分遵業兄
弟並交遊時俊爲當時所美及専朱榮入洛以莊帝爲
從姨兄弟之親相率奉迎俱見害河陰贈并州刺史著
有三晉記十卷

溫子昇字鵬舉太原人晉大將軍嶠之後也世居江左祖

恭之宋彭城王義康戶曹歸魏家濟陰父暉兗州左將
軍長史行濟陰郡事子昇初受學於崔靈恩劉蘭以夜
繼晷乃博覽百家文章清婉爲廣陽王深賤客在馬坊
教諸奴子書作侯山祠堂碑文常景見而善之故詣深
謝曰頃見溫生深怪問之景曰溫生是大才士深由是
稍知之熙平初中尉東平王匡博召詞人以充御史同
時射策者八百餘人子昇與盧仲宣孫季等二十四人
爲高第預選者皆受屈而去季謂人曰朝來靡旗亂轍
皆子昇遂北遂補御史時年二十二臺中彈文皆委焉
服闋還爲朝請李神雋行荊州事引兼錄事叅軍被徵
赴省神雋表畱不遣吏部郎中李獎退表曰昔伯瑜之
不應畱王朗所以發歎宜速遣赴無踵彥雲前失於是

還員廣陽王深爲東北道行臺名爲郎中黃門郎徐紘
受四方表啟答之敏速於深獨沉思曰彼有溫郎中才
藻可畏高車走珍寶盈滿子昇取絹四十疋深軍敗爲
葛榮所得榮都督和洛興與子昇舊識以數十騎濟送
達冀州還京李楷執其手曰卿得免足使夷甫慙德自
是無復宦情閉門讀書勵精不已孝莊卽位爲南主客
郎中修起居注曾一日不直錄尙書事元天穆奏代之
莊帝曰當世才子不過數人豈容爲此便相放黜乃寢
其奏及天穆討邢杲名子昇同行曰吾欲敗其才用豈
懷前忿也子昇不得已見之加伏波將軍爲行臺郎中
元顥入洛天穆名子昇問之對曰元顥新入人情未安
今往討之必有征無戰王若克復京師奉迎大駕桓文

之舉也捨此北渡竊爲大王惜之天穆善之而不能
遣子昇還洛爲中書舍人莊帝還復爲舍人天穆每謂
子昇曰恨不用卿前計除正員郎仍舍人帝殺尔朱榮
子昇預謀赦詔乃子昇詞也榮入內遇子昇把詔書問
是何文字子昇顏色不變曰勅榮不視之永熙中爲侍
讀兼舍人鎮南將軍金紫光祿大夫遷散騎常侍中軍
大將軍領本州大中正梁使張臯寫其文筆傳於江外
梁武曰曹植陸機復生北土恨我辭人數窮百六陽夏
守傅標使吐谷渾見其國主牀頭有書數卷乃子昇文
也濟陰王暉業嘗云江左文人宋有顏延之謝靈運梁
有沈約任昉我子昇足以陵顏轢謝舍任吐沈楊遵業
作文總論以爲古今辭人皆負才遺行澆薄險忌唯邢

子才王元景溫子昇彬彬有德素齊文襄引爲大將軍
諮議作神武碑文成以元僅劉思逸荀濟潛謀疑預知
之餓諸晉陽獄而卒太尉長史宋游道收葬之集其文
筆爲三十五卷子昇言有準的不妄毀譽撰永安記三
卷無子弟子盛州主簿有文才年二十餘卒

北齊

王修太原人風儀蘊藉天保中尙書北海王忻以雅談獲
罪諸弟尙守而不墜自茲以後此道頓微修與范陽盧
昌衡順邱李若彭劉泰珉河南陸彥師隴西辛德源並
爲後進風流之士

隋

王劭字君懋晉陽人松年子少沉默好讀書齊尙書僕射

魏收辟參開府軍事累遷太子舍人待詔文林館時祖
孝徵魏收陽休之等嘗論古事有所遺亡討閱不能得
劭具論所出取書驗之一無舛誤繇是人稱博物後遷
中書舍人隋初授著作佐郎母憂在家著齊書爲內史
侍郎李元操所奏上遣收其書覽而悅之起爲員外散
騎侍郎修起居注劭以上古有鑽燧改火之義近代廢
絕上表請變火從之又言上有戴干之表指示羣臣賜
物數百段拜著作郎屢言符命寵錫日隆時黃鳳泉得
二白石頗有文理遂附其文以爲字於是採人間歌謠
引圖書讖緯依約符命摺摭佛經撰皇隋靈感誌合三
十卷奏之上令宣示天下大業中遷秘書少監卒於官
劭在著作將二十年專典國史撰隋書八十卷多錄口

勅又採不經語初撰齊志爲編年體二十卷復爲齊書紀傳一百卷及平賊記三卷又指摘經史謬誤爲讀書記三十卷人服其精博

王頰字景文祁人僧辨子年數歲入關少好游俠年二十勤學累載遂徧通五經究其旨趣解綴文善談話年三十周武帝引爲露門學士每有議決多頰所爲好讀諸子又曉兵法益有縱橫之志隋開皇五年授著作佐郎尋令於國子講授上親釋奠論難孝經詞義蜂起國子祭酒元善見屈上大奇之超授國子博士後配防嶺南數載授漢王諒府諮議叅軍王甚禮之諒舉兵數進奇策諒不能用楊素至蒿澤將戰頰謂其子曰氣候殊不佳兵必敗汝可隨從我旣而自殺頰撰五經大義三十

卷集二十卷

唐

王珣字伯玉方翼子與兄璵第璿以文學稱時號三王天授初珣及進士第應制科遷藍田尉以拔萃擢長安尉因進見武后召問刑政嘉之詢其族氏對曰廢后臣姑也左遷亳州司法叅軍神龍初爲河南丞武三思矯制貶臨川令宋璟荐授侍御史出爲許州長史歲旱開廩賑民卽自劾元宗赦之累遷工部侍郎而璿至中書舍人珣嘗爲秘書少監數年璿繼職終右散騎常侍卒贈戶部尙書諡曰孝子銅天寶中右補闕殿中侍御史武甄字平一文水人潁川郡王載德子博學通春秋工文辭武后時隱嵩山中宗復位平一居母喪廼召爲起居

舍人景龍二年兼修文館直學士自請抑母黨上言去
歲熒惑入羽林太白再經天太陽虧月犯大角臣聞災
不妄生上見下應信如景嚮詩曰唯此文王小心翼翼
昭事上帝聿懷多福陛下天性孝愛戚屬外家恩洽澤
濡臣一宗階二等家數侯朱輪華轂過許史梁鄧遠甚
恩崇者議積位厚者釁速故月滿必虧日中則移時不
再來榮難久藉昔永淳之後王室多難先聖從權故臣
家以宗子竊祿疏封今上聖復辟宜退守園廬乃再假
光寵爵封如初高班厚位遂超涯極故陰僭陽河洛
汎溢昔王族驕盈梅福上書竇氏專縱丁鴻進諫且后
妃之家恩過寵深一朝覆沒遂無噍類願思抑損之宜
長遠之策推遠之權以全親親慰勉不許遷考功員外

郎時太平安樂公主各立黨相詆毀平一上書請悉召
近親貴人會宴內殿告以輯睦申以恩勤斥姦人塞讒
路上美其忠切卒不用初崔日用自言明左氏它日學
士大集日用折平一曰君文章固耐久若言經則敗績
矣平一乃請所疑日用曰魯三桓鄭七穆奈何答曰慶
父叔牙季友桓三子也孟孫至箠凡九世叔孫舒季孫
肥凡八世鄭穆公十一子子然及二子子孔三族亡子
羽不爲卿故稱七穆子罕子駟子良子國子游子卬子
豐也一座驚服平一問日用曰公言齊桓公楚莊王時
諸侯屬齊若楚凡幾平公靈王時諸侯屬晉楚凡幾晉
六卿齊楚執政幾何人日用謝曰吾不知君能知乎平
一條舉始末無畱語日用曰吾請北面闔坐大笑後設

宴兩儀殿歌言淺穢平一上書言大饗羣臣不容以倡
優媒狎虧污朝典不納元宗初貶蘇州叅軍徙金壇令
既謫而名不衰開元末卒孫元衡儒衡

王翰字子羽晉陽人少豪健恃才及進士第張嘉貞爲長
史偉其人厚遇之張說至禮益加復舉直言極諫調昌
樂尉又舉超拔羣類說輔政召爲秘書正字擢通事舍
人駕部員外郎說罷出爲汝州長史徙仙州別駕日與
才士豪俠飲樂游畋伐鼓窮歡貶道州司馬卒

路敬淳并州人少好學盡孝居喪依廬三年尤明姓系以
譜學名家

王維字摩詰九歲知屬辭與弟縉齊名資孝友開元初擢
進士調大樂丞坐累爲濟州司倉叅軍張九齡擢右拾

遺歷監察御史母喪毀幾不生累遷左補闕庫部吏部
郎中天寶末爲給事中及西狩維爲賊得以藥下利陽
瘖祿山迎置洛陽廼爲給事中時大宴凝碧池悉召梨
園諸工合樂賦詩悼痛云萬戶傷心生野烟百官何日
更朝天秋槐葉落空宮裏凝碧池頭奏管絃賊平下獄
或以詩聞行在縉請削官贖維罪肅宗亦自憐之下遷
太子中允久之遷中庶子中書舍人復拜給事中轉尙
書右丞縉爲蜀州刺史未還維自表已有五短縉五長
臣在省戶縉遠方願歸所任官放田里使縉得還京師
久乃召縉爲左散騎常侍上元初卒年六十一贈秘書
監維工草隸善畫名盛於開元天寶間寧薛諸王待若
師友寶應中代宗語縉曰朕嘗於諸王座聞維樂章今

傳幾何遣中人王承華往取縉哀集詩六卷文四卷上之

王之渙并州人兄之咸之賁皆有文名天寶間與王昌齡崔國輔鄭昉聯唱迭和名動一時

劉縱陽曲人陳許軍節度使昌裔子爲光祿主簿學於樊宗師士大夫多稱之

王墳太原人韓愈送墳序曰太原王墳示予所爲文好舉孟子之所道者與之言信悅孟子而屢贊其文辭

王彥威太原人少孤貧力學舉明經甲科淹識古今典禮求爲太常散吏卿知其經生補檢討官彥威采獲隋訖唐沿革禮條次彙分號元和新禮上之拜博士憲廟歲山陵事議用十二月下宿建言高祖中宗六月太宗四

月睿代二宗皆五月德宗十月順宗七月惟元肅二宗皆十二月有爲爲之非常典也且卜歲暮則畢祔在明年正月是改元慶賜皆廢矣詔更用五月李夷簡言憲宗功高宜稱祖穆宗下其議彥威奏宜稱宗制可時祔主畢又還告太極殿彥威以爲不可執政怒坐視辭誤奪俸削階終不回屈後累擢司封郎中宏文館學士諫議大夫爲勘定淄青十二州兩稅使差糧纖悉人不爲煩還兼史館修撰興平民上官興殺人亡命吏囚其父興自首請罪議減死上言殺人者死百王共守原而不殺是教殺人有詔貸死彥威詣宰相據法爭下遷河南少尹俄改司農卿雅善李宗閔進拜平盧節度使開成初名爲戶部侍郎判度支嘗見文宗顯奏曰臣按見財

量入以爲出隨色占費終歲用之無毫釐差假令臣一旦迷愚欲自欺沒亦不可得因上占雜圖又爲供軍圖上之嘗奏復神策軍以廩縑於度支取直俄檢校禮部尚書爲忠武節度使毀山房三千餘所盜無所容徒節宣武封北海縣子性強敏善著書多行於時卒贈尚書右僕射諡曰靖

溫岐字飛卿改名廷筠彥博裔孫少敏悟工爲辭章與李商隱皆有名號溫李與貴胄裴誠令狐滈等狎數舉進士不中第授方山尉徐商鎮襄陽署巡官不得志去歸江東令狐綯方鎮淮南廷筠怨居中時不爲助力過府不肯謁徐商執政頗右之欲白周會商罷楊收疾之遂廢卒

白行簡字知退太原人居易弟擢進士辟盧坦劍南東川
府入朝授左拾遺累遷主客員外郎判度支案進郎中
長慶時振武營田使賀拔志歲終結課最詔閱實發其
妄寶歷二年卒

唐彥謙字茂業并州人通時舉進士十餘年不第乾符
末携家避地漢南中和中王重榮鎮河中辟從事光啟
末貶漢中掾曹楊守志鎮興元署判官累官至副使閬
壁絳三州刺史彥謙博學多藝文詞壯麗書畫音樂胥
出輩流號鹿門先生集三卷

溫憲庭筠子登進士第光啟中爲山南從事能世其詩學
王景太原人爲司門員外郎蔡州刺史能詩

王武陵字晦伯太原人官尚書郎能詩嘗序宿慧山寺詩

曰視富貴如浮雲一歌一咏以紓情性

狄煥字子炎梁公仁傑之之後隱於南岳有詩名

王緒太原人僧辨裔孫謨永寧公輔梁書黜陳不列蕭穎士佐之著蕭梁史譜及梁不禪陳論以發緒義例

後五代

王景純太原人少客燕感承世儒者不當用材武進乃南遊高洛得譚用之爲友以文章相砥礪寢以文稱天會中還家至境上會北漢元宗據太原嘆曰天下將定以區區一方拒天下兵此危國也遂止上黨潞州帥延致幕府後不復作吏時時購四方書鈔之晚年集書數千卷北漢亡入宋端拱中終於汴

宋

陶穀字秀實太原人本姓唐祖彥謙有詩名父煥領夷州刺史唐季爲邠帥楊崇本所害因隨母柳氏育邠州之新平十餘歲能屬文起家校書郎單州軍事判官避晉祖諱改姓陶嘗以書干宰相李崧崧甚重其文時和凝亦爲相同奏爲著作佐郎集賢校理改監察御史分司西京遷虞部員外郎知制誥會晉祖廢翰林學士兼掌內外制詞目繁委穀言多委愜爲當時最天福八年賜緋袍靴笏黑銀帶九年加倉部郎中穀性急率嘗與兗帥安審信集會杯酒相失爲審信所奏時方姑息武臣穀坐責授太常少卿嘗上言頃涖西臺每見臺司詳斷刑獄少有卽時決者至於閭閻夫婦小有爭訟淹滯踰時坊市死亡喪葬必俵臺司判狀奴婢病亡亦須檢驗

吏因緣爲奸而邀求不已經旬不獲埋瘞望申條約以
革其弊從之俄拜中書舍人嘗請教習樂工停二舞卽
及禁民伐桑棗爲薪並從其請開運三年賜金紫契丹
北歸脅穀令從行穀逃匿僧舍中穀頗工歷數謂同輩
曰西南五星連珠漢地當有王者出契丹主必不得歸
國及耶律德光死有白光芒指北穀曰自此契丹自相
魚肉矣遂歸漢爲給事中乾祐中令常叅官轉對穀上
言曰五日上章曾非舊制百官叙對且異昌言徒浼天
聰無益時政乞停轉對羣臣有所聞見卽許不時詣闕
聞奏從之仕周爲右散騎常侍世宗卽位遷戶部侍郎
從征太原爲翰林學士時命承旨以下撰爲君難爲臣
不易論平邊策以進惟穀與竇儀楊昭儉王朴稱旨顯

德三年遷兵部侍郎加承旨世宗畱心稼穡命工刻木
爲耕夫織婦蠶女之狀置於禁中思廣勸課之道穀爲
贊辭以進顯德六年加吏部侍郎宋初轉禮部尙書依
前翰林承旨乾德二年判吏部銓兼知貢舉再爲南郊
禮儀使法物制度多穀所定時鹵簿清游隊莫知甲騎
具裝制以問穀穀上其制又大輦制久亡穀創意造之
後承用焉明德門成詔爲記後累加刑部戶部二尙書
開寶三年卒年六十八贈右僕射穀強記嗜學博通經
史諸子佛老咸所總覽多蓄法書名畫善隸書爲人雋
辨宏博而多忌好名云子邴起居舍人天禧四年錄穀
孫實試秘書省校書郎

按宋史陶穀係邠州新平人今舊志皆言是太原人

未知孰是姑存之以俟博攷者

主貽孫字象賢溥子少隨周祖署商潁二州衙內都指揮使顯德中改朝散大夫著作佐郎宋初遷金部員外郎賜紫累遷右司郎中淳化中卒溥聚書萬餘卷貽孫遍覽之多藏法書名畫太祖嘗問趙普拜禮何以男子跪而婦人否普問禮官不能對貽孫曰古詩云長跪問故夫是婦人亦跪也唐武后朝夫人始拜而不跪普問所出對云太和中幽州從事張建章著渤海國記備言其事普大稱賞之端拱中右僕射李昉求都省百官集議舊儀貽孫具以對時論許其諳練云

楊寘字審賢晉人察弟也少有雋才慶歷二年舉進士京師試國子監禮部皆第一既試崇政殿上臨軒啟封見

名喜動於色謂輔臣曰楊寘也遂擢第一公卿稱賀爲
得人授將作監丞通判潁州未至官持母喪病羸卒特
詔賻恤其家先是其友夢寘作龍首山人寘自謂龍首
我四冠多士山人無祿位之稱我其終是乎已而果然
狄遵度字元規棐子少穎悟篤志於學每讀書意有所得
卽仰屋瞪視人呼之弗聞也以父任爲襄邑縣主簿居
數月棄去好爲古文著春秋雜說多所發明嘗作擬皇
太子冊文除侍御史制裴晉公傳人多稱之尤嗜杜甫
詩嘗讚其集一夕夢見甫爲誦世所未見詩及覺僅記
十餘字遵度足成之爲佳城篇後數月卒有集十二卷
任山平晉人有大志法春秋作通記擬井田作中田圖嘗
應詔言事富弼厚遇之所著有晉溪集

邢鑑字叔明文水人少而篤學有經世濟物之心從晉谿
任先生遊講習十年行修經明時方以詞賦取士鑑潛
心經術因見詘於是講道山林不復以仕進爲意嘗與
叅政歐陽修范仲淹學士石介爲知交卒年六十有七
王詵字晉卿緘字工詩畫日從蘇軾游詩牋酬答無間尙
主官至雷後

按明時滕用亨善鑒古嘗侍成祖觀畫卷未竟衆目
爲趙伯駒用亨曰此王詵筆也至卷尾果然其爲後
世推重如此

金

王璣字君玉太原人天眷二年進士弟珙字器玉珣字汝
玉皇統九年同榜家世業醫有陰德聞里中嘗有金蠶

金馬之瑞壽仕至汾陽軍節度使鄉人榮之號三桂王氏仲澤其從孫也金馬在部掾清卿房迄今寶之

劉滋字文榮合河人

卽興縣

六歲賦詩曰鶯花新物態日月

老天公

劉昂字子昂興州人

金於興縣置州

大定十九年進士曾高而下

以科名相踵者七世昂天資警悟律賦自成一家輕便巧麗爲場屋捷法作詩得晚唐體尤工絕句往往膾炙人口初由省掾授平涼路轉運副使俄丁母憂爲當塗耆所忌連蹇十年卜居洛陽有薦其才者泰和初自國子司業擢左司郎中會緣執政賈鉉事降上京畱守判

官道卒

郝傑字子玉太原人正隆二年進士歷鳳翔府治中充遼

史刊修官仕至河東北路轉運使自號虛舟居士有集
行世張汝霖嘗奏曰郝僕能屬文宦業亦佳章宗謂宰
臣曰郝僕賦詩佳舊時劉迎能之李宴不及也子居簡
字仲寬有詩名太原平陽間居中字仲純樞密院令史
出身嘗刺坊州人物楚楚正大未除鳳翔治中南山安
撫使詩亦有名

倪民望字具瞻李屏山所謂倪侯頭如筆其鋒不可當者
也又張韶九成寄朔州荀輔臣云陳雷膠漆輕餘子楚
漢風雲屬少年李忠宣卿賦雲云不將柳絮春風比好
作梨花月夜看至於蘇吉莘老李鵬翼冲霄與具瞻之
子仲儀詩文多可傳

李汾字長源太原人爲人尙氣跌宕不羈性褊躁觸之輒

怒是以不爲人所容喜讀史工詩雄健有法避亂入關
京兆尹子容愛其才招致門下留二年去之涇州謁左
丞張行信一見禮以上客元光間游大梁應舉不第用
薦爲史館書寫殊不自聊時趙秉文爲學士雷淵李獻
能皆在院刊修際汾在旁正襟危坐讀太史公左邱明
一篇或數百言音吐洪暢旁若無人旣畢顧四座漫爲
一語云看秉筆諸人積不平而雷李尤切齒乃以嫚罵
官長罷去明年上書言事不合客唐鄧間恒山公武仙
署行尚書省講議官旣而仙與叅政完顏思烈相異同
頗謀自安懼汾言論欲除之汾覺遁泌陽仙令總帥王
德追獲之絕食而卒年未四十平生詩甚多不自收拾
傳者十二三而已

王渥字仲澤後以字行太原人性敏俊不羈博學善談論
工尺牘字畫清美有晉人風少游太學長於詞賦登興
定二年進士第爲時帥奧屯邦獻完顏料烈所知故多
在兵間後辟寧陵令有治蹟入爲尙書省令史使宋至
揚州應對敏給宋人重之還爲太學助教轉樞密院經
歷官俄遷右司都事稍見信用及內族思烈行省事於
鄧州以渥爲左右司員外郎從行思烈入援自汝州過
密縣遇元兵武仙欲阻澗思烈不聽渥勸曰武仙大小
數百戰經涉不爲不多兵事當共議思烈疑其與仙有
謀幾斬之渥自以爲無愧於內不懼也已而思烈果敗
渥歿於陣中仲澤博通經史有文采善談論工書法詩
其專門之學人物楚楚若素宦於朝吏事則與冀京父

相上下其辨博又屏山所許天下談士三人之一也

常添壽太原人四歲能作詩時與易州麻九疇俱稱神童

元

同恕字寬甫其先太原人五世祖僑奉元祖昇父繼先博
學能文廉希憲辟掌庫鑰家世業儒同居二百口無間
言恕羈卯如成人日記數千言年十三以書經魁鄉校
至元間貢禮曹辭不行仁宗初拜國子司業儒林郎三
召不起陝西行臺侍御史趙世延請卽奉元置魯齋書
院中書奏恕領教事制可之來學者千數延祐時再主
鄉試人服其公六年以奉議大夫太子左贊善召入見
東宮賜酒慰問因獻書歷陳古誼英宗初以疾歸致和
元年拜集賢侍讀學士以老疾辭恕之學由程朱上邈

孔子孟教人曲爲開導性整潔平居雖大暑不去冠帶事
異母如所生父喪哀毀致目疾家無儋石儲而聚書數
萬卷扁所居曰渠菴時蕭鄰居南山下入城府必主恕
家士論稱曰蕭同恕家居十三年鄉里稱先生而不姓
至順二年卒年七十八贈翰林直學士封京兆郡侯諡
文貞著渠菴集二十卷

張欽榆次人登進士第歷太原路儒學教授博洽善屬文
有韓柳風士類多宗慕之

郝忠恕交城人佑之子翰林待制獻所著無逸圖帝悅命
總裁宋遼金三史書成告歸終身不出

王守誠字君實陽曲人氣宇和粹性好學從鄧文原虞集
游文辭日進泰定元年試禮部第一授秘書郎遷太常

博士續編太常集禮若干卷轉藝林庫使與著經世大典拜陝西行臺監察御史除奎章閣鑒書博士拜監察御史僉山東廉訪司事改戶部員外郎中書右司郎中拜禮部尙書與修遼金宋三史書成擢叅議中書省事調燕南廉訪使至正五年除河南行省叅知政事奏差憲使籍廉訪使家銅梁縣尹張文德捕殺賊百餘人重慶府官以私怨使縣吏誣之擬杖一百爲直其事辨析贓訟多所平反釐正職田因疏言仕於蜀者地僻路遙俸給薄何以自養請以戶絕及屯田荒者名人耕種收其入以增祿秩宜賓縣尹楊濟亨欲於蟠龍山建憲宗神御殿儒學提舉謝晉賢請復文翁石室爲書院皆采以上聞成之風采聳動居諸道最進資政大夫河南行

省左丞未上母喪遭疾至正九年卒年五十四賜鈔萬緡諡文昭有文集若干卷

郭恭元貞間登進士第善用帛爲大書飛動有神今大成殿東羅漢堂扁皆其遺筆

聶天章交城人至元間舉進士第善文辭有修行授朝列大夫後左遷趙城令因辭歸不出

第五居仁太原人器量宏遠經明行修而力農自給教授生徒凡數百人卒後門人私諡曰靜安先生

省志作周居仁謨

胡巨源榆次人登進士第任高麗軍民總管儒學教授博學多著述蔚有文稱子惟堯領鄉貢仕晉寧路學正寬裕不事邊幅七子樂與之游博雅出巨源右

杜質榆次人性嚴重博學有雅量一吟一詠胥包括道義

激勸風化士林雅重之歷翰林院編修江北燕南兩道
廉訪司經歷江南諸道監察御史

程邦彥祁縣人工詩賦善草隸時稱三絕歷官汾州同知
明

楊一奇交城人嘉靖癸未進士河南嵩縣知縣執法除暴
吏畏民懷陞陝西鄜州知州未赴著有太極圖說畧義
學史談易經四書讀書錄補讀書紀見自笑錄體物韻
語行於世

閻樸字文甫榆次人教諭大綸子嘉靖壬辰進士改庶吉
士李文康極器重之授檢討晉左贊善告歸值敵犯邑
城與有司協力固守起補原官兼署司經局印陝西守
臣請復河套下九卿會議樸亢聲曰謀事貴有成算今

海內困敝兵食兩虛深入窮荒倘有蹉跌爲害匪細議
上得允遷南京國子監祭酒進六館諸生嚴試之如鎖
闈例且曰儒者立志當以聖賢爲準聖賢一誠其本五
倫其實六德六行六藝其目也閱五旬忽有旨以赴任
違限勒令閑住歸築小園結茅屋數椽列琴尊圖史其
中優游以終老所著有通鑑逸旨榆次志山西通志稿
王道行字明甫陽曲人嘉靖庚戌進士初授鄧州知州遷
大名同知轉蘇州知府正直廉介所至吏畏民懷尋陞
應天副使陝西叅政再陞河南按察使四川布政使以
耿介忤當路歸杜門著書有桂子園集

朱表杪字竹溪陽曲榮靖王曾孫醇謹好讀書曰取秦漢
典籍朝夕雜誦間爲詩賦喜臨池尤善草書宗二王法

子知鰲束髮習聲律年甫壯學成嘗遊玉柱峰藐姑射山所至多佳句士大夫稱之

徐行崑嵐州人性強記爲交千言立就志行敦篤善教人治戴禮者胥出其門隱居草野讀書自娛年八十餘手不釋卷子瑤永平教授珮無錫承咸有父風

李重熙崑嵐州人家貧不能給饘粥棲西山寺不爐不扇足迹不入城市有句云聖賢渡口休行錯義利關頭要認真蓋自况也

王繼臣崑嵐人宗陽明甘泉之學議論多出人意表穆侍御按臨諸生迎道左繼臣獨隱樹後穆呼而責之繼臣曰方今大同兵變邊鄙多虞非天下無事時也明公不詢及一言乃屑屑與書生較短長邪穆默然督學廖較

士至州講不貳過章繼臣曰紫陽註亦有誤處今云過於前者不復於後是矣乃註仁則曰顏子不能不違於三月之後豈非自相矛盾乎廖文宗韙之及卒貧不能舉喪友人慕其義醵金葬焉

國朝

李中馥字鳳石太原人天啟舉人性剛鯁進退不苟爲孝廉五十年未嘗一入公府直指使者薦辭不赴優游泉石間甲申闖寇遣人授僞官怒曰乃公向不趨召今寧爲賊屈耶閉門臥不起比姜逆亂登陴畫守禦方畧縣令恃以無恐雅嗜讀書晚年益勤朝夕不釋卷所著有從好集石鼓考本草目錄銀杏園文集

侯璋字樸庵陽曲人康熙丁未進士官內閣中書少穎異

有經濟學熟肄禮樂兵農錢穀鹽鐵諸務及改試策論
指陳利害殊悉戊午典湖廣鄉試手諸生卷殫神簡閱
夜漏數十下不少倦榜發日卒

閻若璩字百詩太原人少奇慧博極羣書而句字必精核
不少苟尤嗜吟詩類張籍王建山左趙執信嘗謂山陽
閻百詩學問博洽前無古人其見重於時如此康熙戊
午舉博學宏詞卒若璩僑居淮安故稱山陽閻百詩云
所著四書釋地名六卷辨証經史疑義四卷困學紀聞
註証三十卷孟子生卒歲月考一卷子詠進士官中書
舍人亦以文名

張志遠字鵬期陽曲人品行端潔爲諸生博學工制藝善
詩詞旁通醫學而楷書尤精得黃庭遺法督學高龍光

稱其整密勁雅可配文待詔晚年學益勤聚書手自
評隲著詩詞稿三卷詩叶正韻一卷切音要訣一卷醫
學抄要八卷

王介石字豫二榆次人少喜讀書比壯益究經史旁及釋
老之學皆有論說傳山見而悅之贈詩定交爲平遙司
訓以古文教諸生士多嚮之遷廣昌司論升河南桐柏
令未之任而卒

張聖大字庸爾興縣人性至孝年十四補弟子員壬申舉
於鄉博極羣書教授生徒多所成就

高若岐字天柱太原人恩貢生肆力經史百家爲文章詩
詞討論精核以真切爲主雍正間修邑志旣而儲大文
應晉撫聘修通志聞岐名以書招與同事見其著作輒

贊賞之其書法宗傳山有名於世

雷仁育字萬有太原人乾隆丁巳進士除宣平令政尚寬簡兩充同考官所拔皆知名士歸田後學益精教授生徒恒數十百人

蔣岐鳳字鳴瑞陽曲人乾隆己卯舉人性至孝家貧授徒以供繼母好讀書寒暑不輟以文名於時

曾璜陽曲縣歲貢父沒家貧窶繼母殷矢以死殉父璜長跪哀慰每食親供母寢猶侍立窗外無冬夏者屢年繼母有女適同邑張隨嘉嘉外出四十餘年無音信子女皆無養璜撫字聘深皆不失所迄今女得全節載入志性好學辛勤無間文藝真切教育人材成就者甚衆遠

送咸佩服

太原府志卷三十七

孝義

惟皇降衷厥有恒性孝義二者居天下之大端矣縉紳之家稱先則古固宜發名成業模楷人倫至若閭巷小民名不掛於通人身未登於朝右而至性適合經常幽貞可懸日月所謂匹夫慕義何處不勉發潛德之光是
在載筆者加之意焉耳我

國家敦崇實行忠孝節義各有專祠所以牖世覺民者備至太原爲唐虞舊俗沐化最深凡有履孝秉義克踐恒性者亟搜採而筆之以爲風俗勸志孝義

漢

溫壽序長子爲鄒平侯相序先賜葬洛陽城傍壽夢父生口

曰久客思鄉里壽卽棄官上書乞序骸骨歸葬帝許之
乃扶喪反舊塋焉

宋

王寬元謨次子泰始初爲隨郡太守逢四方反元謨在建
鄴寬棄郡歸以母在西爲賊所執請西行遂襲破隨郡
收其母事平明帝嘉之使圖寬形以上

王文和鎮北大將軍仲德兄孫也景和中爲義陽王景征
北府主簿景於彭城奔魏部曲皆散文和獨隨至界上
景謂之曰人皆去卿有老母何不返邪乃去齊永明中
歷青冀兗益四州刺史平北將軍

南齊

孫淡太原人居長沙母疾溘廢眠食以差爲期母哀之後

有疾不使知也豫章王領湘州辟驃騎行叅軍建元三年蠲租稅表門閭

陳

王知元太原人僑於會稽鄞縣居家以孝聞及丁父憂哀毀而卒高祖嘉之詔改其所居清苦里爲孝家里

北魏

王寶興寧南將軍慧龍子少孤事母崔至孝尙書盧遐後妻寶興從母也緣坐沒官度河鎮高車滑骨寶興盡賣貨產自出塞贖之以歸州辟治中從事別駕舉秀才皆不就閉門不交人事襲州長社侯龍驤將軍子瓊

王元遜思政長子從父守潁川城陷遇害

隋

韓子誕文水人親歿負土築墳居喪盡禮詔旌其孝及卒視其脊骨皆毀大業末表其門閭唐貞觀中蠲其賦役郭世儁字宏父一作郭儁文水人七世同居其家犬豕同乳烏雀同巢人以爲義感事聞文帝遣平昌公宇文弼勞旌門賜表

唐

武宏度文水人補相州司兵叅軍永徽中父卒自徐州被髮徒跣趨喪所負土築塋晨夕號日一溢米素芝產廬前狸擾其旁下詔褒美旌其門

溫振并州祁人彥博子歷太子舍人居喪以毀卒

孫楚金道源族孫有至行年十七與兄越石皆舉進士州欲獨薦楚金固辭請俱罷都督李勣嘆曰士求才行者

也既能讓何嫌皆取乎乃並薦之累進刑部侍郎儀鳳
初彗見東井上疏陳得失高宗納之賜絹二百段武后
時歷秋官尚書爵南陽侯居官有清槩爲酷吏所搆貶
死嶺表

狄光遠仁傑子傑爲來俊臣誣搆下獄以帛書置褚衣中
付家光遠得書上變武后乃召見仁傑於是同時被誣
者七族皆貸

王燾珪孫性至孝爲徐州司馬母有疾躬奉湯劑彌年不
廢數從高醫遊遂窮其術因著外臺秘要討繹精明世
寶焉歷給事中鄴郡太守治聞於時

王砥珪元孫官評事於杜甫爲再從表姪甫有送重表姪
王砥評事使南海詩曰吾客左馮翊爾家同遁逃爭奪

至徒步塊獨委蓬蒿逗遛熱爾腸十里却呼號自下所
騎馬右持腰間刀左牽紫遊韁飛走使我高苟活到今
日寸心銘佩牢則鍊之所爲亦可謂義矣

王士昊太原府市人馮秀誠榆次縣農人皆以割股救母
疾見節度使合狐楚奏狀

盧遺仁王知道皆太原人前後以事親居喪著至行天子
旌表門閭賜粟帛州縣存問復賦稅見唐書孝友傳叙
後唐

張郎太原人叔父憲爲莊宗魏博推官王師與梁戰不利
憲奔馬北渡梁軍急追殆將不濟至晚渡河人多陷水
而沒憲與郎履冰而行將及岸冰陷郎號泣以馬垂引
之憲曰吾兒去矣勿使俱陷郎曰忍觀季父如此俱死

無恨即偃冰引垂憲躍身而出是夜莊宗令於軍中求
憲或曰與王緘俱沒矣莊宗垂淚求尸數日間其免也
遣使慰勞

宋

劉孝忠太原人母病經三年割股肉斷左乳以食母母病
心痛劇燃火掌中代母受痛及母卒爲傭富家得錢以
葬富家知其孝養爲已子後養父失明忠舐之復能視
太祖征太原召見慰諭

閻榮榆次人倜儻有志畧劉繼元欲召至帳下辭以母老
不就子守恭生而奇偉榮曰此兒當事太平天子無復
恨矣後十七年劉氏平守恭仕至德州刺史并代路兵
馬鈐轄

張橫太原人靖康末糾義衆二千往來嵐州憲州間五年
九月禦敵於憲州勝之

薛傲榆次人從其父客汴父歿雷汴宣和靖康間金人南
侵朝廷將割三鎮傲感憤上狀政府言國家有三鎮猶
室有垣墉人有股肱也安有自去其股肱垣墉而尚能
存全者哉又切詆執政誤國徐處仁李邦彥等大怒逐
之去之河東又入陝金人侵陝傲以策干王庶庶不用
乃結陝子弟聚保延安山谷中金將婁室屢攻之傲築
土寨甚堅不能拔益團鍊鄉勇衆至數萬會張浚之敗
陝西五路盡沒傲知事不可成帥三千騎奔吳玠於蜀
玠奏之朝授一官傲屢爲玠言入陝方畧時方議和悒
悒不得志棄官入青城山不出見靖康忠義傳

金

王忠立岢嵐人妻亡不再娶結廬蘆芽山隱居終老

元

溫義祁縣人五世同居長幼無私財家庭無間言至元丙子旌其門曰義門

李瓚祁縣人孝母宜家百口同爨曾獲盜相識遺布疋送出門家人叩姓名亦不告

姚相文水人捐立學田見邑志

明

程宗齊陽曲人性孝友親疾求以身代及卒悲悼廢食變弟宗望誓不析居常置義塚及園畦三百以贍族人

白祥文水人父責令長山以事連坐當刑祥請代臨刑神

色不變成祖嘉其孝父子俱免大宥天下時銜祥恩者
繪像祀之

段廷用陽曲人奉孀母極孝母故日夜悲號既葬於墓側
結茅屋枕苫飯蔬敝衣茹面歲饑盜不忍驚害種瓜麥
雙岐並蒂人以爲孝感云

周紳陽曲人事孀母姜圖刀圭以奉甘旨侍疾送終胥如
禮結廬墓側盜賊相戒勿驚

程書陽曲人父宗齊母張氏朝夕奉養父中濕衣不解帶
延八月竟不起哀毀骨立事母彌孝敬鄉評重之

朱慎鍛晉靖安王長子好讀書性至孝母妃盧氏疾危呼
天割股求以身代及母愈因過勞成疾而卒

馬謨太原人父早逝事母器用飲食精潔或自斑舞合

婢觚角歌呼以悅親心日取廁褳躬自浣滌母登大耋
祝天以已算益之及施濟無告哺育棄兒以祈母壽母
卒葬畢以哀思亡

王英太原左衛人少孤育於祖母母病割股以進尋愈登
成化鄉試授滕縣令有惠政陞登州府通判

陳舉太原左衛人事養母至九旬孝思愈篤母卒廬墓三
載舉時年已七十矣

趙定太原前衛人兄宥遘難警所居以助之一夕竊者入
其室善言勸諭慮爲邏者所獲天明始遣去子登賢書
段廷宴太原人貢生任撫寧令事親竭力居喪三年人莫
覩其面

趙威晉太原人父爲諸生游學不歸威晉生未週歲及長

以不識父面爲恨言輒流涕遍
山卽日推小車覓之果得扶歸
詢僧道或告以在終南

趙洪遠太原人父瑀母張氏自受
飭所在給穀以示獎
饑寒竭力奉養巡按趙

程巖陽曲人孝事嫠母五十年如
散兄弟喪祭之費已獨任之
一日母亡所遺服飾分

陳天壽陽曲人事嫠母至孝宗黨
歛皆出其力又張珠夫婦遭疫
人率畏避二子方脫襁
襁携之以歸卒賴全活

趙復性榆次庠生以孝聞父卒號
泣不食數隕絕及葬廬
墓草衣糲食終喪不忍離族人
毀其廬載歸後旌表

劉陽插部內侵時未週歲母棄之
祖母王道聞啼聲挾陽

以歸王氏寡居四十餘年陽朝夕不離及歿圖形事之
韓朝花太谷人家貧業推小車出外必計往還日備飲食
費以供父母出告反面跪拜問安始終不二

程文宿太谷人樸實不知書母疾祝天以已算益之母卒
哀毀骨立廬墓三年

賈謨太谷人家貧業染母年七十逐日力養得美食卽以
奉母母悅乃安

孫昂交城人父歿廬墓羣鴉悉集朝去暮來嘗之蒲州渡
黃河有老人同渡拽舟使獨後俄見前船覆溺昂得免
張浚明交城諸生事繼母撫羣從以孝友著

劉盈徐溝清源鄉人童年知孝居喪哀毀踰禮母蘇病危
割臂肉以進

劉秉寬清源人母病刲股以進病卽愈一夕如聞母呼驚覺出戶屋梁隨折枕爲之碎弟秉暢悞傷人至死訟於官寬憫其無子代受刑其人二日復甦遂得釋

董玉常源人置義田百畝於堯城鎮建社學以育才人多高之

孟養氣文水人事繼母撫諸弟以孝友著

張鳳翔文水舉人孝事嚴父父歿號泣蔬食三年

李玟文水人王府典膳事嫠母惟謹母卒廬墓三年羣盜不忍驚

胡誥文水庠生親歿廬墓人皆呼爲孝子室

郭拖文水人性孝父廷詩好施與拖能繼之親疾禱神求代歿則號泣廬墓年老無子夢神語曰爾孝德格天當

錫爾子果舉嗣應鰲應泰孫鉉俱以文行名

鄭位文水諸生事繼母以孝聞同諸弟赴汾州試拾遺金悉歸失者性不喜飲鄉有忿爭率置酒解之家頗貧周給無倦色以子之僞貴三膺封

王在庭文水庠生事親以孝不入公門拾還遺金賑貧解紛又孟靈鳳增廣生崇禎末民饑盡出所儲分給鄉里全活甚衆

王景能祁縣人事孀母以孝聞孫天爵領鄉薦

渠永昌祁縣人性天醇樸孝友並著累賓鄉飲壽至九十
九歲

閻紹芳祁縣人祖喪承重茹素三年

胡濂祁縣人性剛方尚氣節赴兄急難慷慨殺身

李春茂嵐縣志作楊春茂孝事父母母歿事父尤謹旨指
某給粟以旌之

邱憲章嵐縣人力農好施敦孝弟父疾步禱恒獄不解衣
者旬月母疾籲天求代母卒哀毀不離柩旁

常泰徐溝進士十歲能文性至孝父病嘗糞甘苦

溫和嵐縣歲貢祖早卒善事祖母張氏稱順孫父卒事嫡
母梁生母田俱以孝稱

郭安興縣人有孝行前後廬墓六年有白鶴旋繞之異
白好古興縣人親卒廬墓六年

胡玉琴興縣人父博娶關氏生尙默次娶甄氏生玉琴甄
疾兄弟並事之惟謹及歿並廬墓側父歿琴復廬墓哭
思成疾卒妻劉氏年少撫孤稱節孝

康玉潔興縣監生親死廬墓鄉人稱孝

邱鳳軒嵐縣人寇犯石州率衆禦之事聞拔入太學

韓子名興縣人祖母與母俱孀居竭力奉養祖母卒哀毀

骨立母卒廬墓三年

張聖大興縣人舉明經性至孝卮養備至父卒哭之一夜

鬚髮盡白

馮時亨興縣人父境爲諸生早卒母康邁危疾思得鹿肉

禱於城隍神刲股肉代之疾尋愈祀孝義祠

孫光勳興縣人歲旱輸賑奏得旌表子守訓年五十無子

賈太原置一妾知爲都司張某女張虧官帑八百金以

女售人訓惻然傾囊償之不告姓名而去後舉三子

孫興太原人尙義好施邑舉鄉飲辭不赴

朱景祥岢嵐人正統間蠲粟一千五百石賑荒勅建坊表
栗仲仁岢嵐人天順成化間蠲粟拯饑表給冠帶

董志山祁縣人行客遺金追還之不受謝

王璞昶五世孫周急賑荒養姑撫妹人以爲難屢賓鄉飲
奉勅建坊

郝希敏祁縣人正統年捐粟千餘石賑荒有司奏聞旌表
杜宏付太谷人正統間捐賑一千五百石旌表

于敏榆次人正統間輸財助官賑濟旌義民

王朝冕興縣人母疾禱神代死及卒隨柩廬墓三年朝夕
哭奠有司賜米帛旌表

閻表陳立王文胥俱交城人正德時捐賑各二千石旌表
金中夫一作天夫榆次人弱冠時父鼎罹危疾割股和湯

以進疾遂瘳

白壘興縣人性至孝母病危焚香求代果愈縣令旌之
常福交城庠生父歿廬墓日夜悲泣者三年萬歷間旌表
呂誠交城人母死廬墓稱孝

韓友范岢嵐人崇正間知慶陽府時歲荒斗米銀三兩友
范設法賑饑全活甚衆

馬瑞陽曲人富而好施間有婚喪輒爲周助插部內侵捐
金給守城夫役常助修書院及城隍廟費千緡孫諫登
進士又王光欽萬歷間捐修橋梁表給冠帶

張運通榆次人方七歲父御史養以劾權璫下獄運通入
狂狴侍左右尋復具疏闕下請以身代士大夫胥驚異
之御史在獄七年甲申賊出之於獄將甘心焉運通號

泣祈免血淚迸流賊稱其孝釋御史後又以追餉解鎮
安運通從之拾橡粟以自給行達商州猝遇虎虎逡巡
去父歿喪葬無違禮事母尤篤邑令劉星嘗著孝子傳
裴潤陽曲諸生居喪哀毀廬墓三年以子希度官贈奉政
大夫通政司右叅議祀鄉賢

馮瓊陽曲貢士受定興訓導以孝友稱博學介行舉鄉飲
妻卒不再娶

樊維藩陽曲諸生闖圍太原率丁夫守城捍禦甚力城陷
被殺

楊方生陽曲人性慷慨尚節義闖寇之變二弟被執時方
生居鄉急奔詣賊曰我楊氏冢子某有事當任於二弟
無與賊釋其弟囚之凡兩月幾死後得脫

張治經齊榷俱監生張治度趙芳任三讓桑荷神州俊李
聯捷王國昌李塾侯之翰齊人道寇獻瑜寇獻球寇永
澆褚延文李塘李幹智大用褚延寬李登龍寇省身發
身王瑄王建九孫承志董萬有李自登程雲步張辨齊
文輝王度宏翟漢傑張鳳翔張運隆郝龍正俱庠生侯
祥副榜郝應麟王輔國俱武舉闖賊陷榆次城俱守城
死義

郝士林榆次人賊圍榆次士林率丁夫守城晝夜不倦城
破被執命之跪士林向南而立脅之降曰吾三晉義士
豈肯降若賊怒腰斬之

杜光輝太谷人貢生擢之于博覽羣書性喜吟咏闖賊陷
城不屈投井死之

郭民翰太谷人家世業儒教授生徒凡忠孝節義之事必
反復講論期共勉勵值闖賊陷城守陴者皆潰散獨挺
鎗奮呼集衆拒賊力盡被執罵賊投井死

趙譔太谷人疎財好施闖賊陷城不屈遇害

李元芳太谷人賦性剛直闖賊之變被執罵不絕口與妻
貞氏同遇害

自觀光太谷廩生賊陷城入宅正襟危坐衣冠不亂賊迫
脅不屈投井死

尹就湯興縣人天性純篤道義自持嘗捐金以賑貧合邑
感之祀鄉賢

孫世蕃興縣人慷慨多大畧明末邑大旱斗米千餘錢鄰
邑販粟至者率爲士盜所劫蕃奮請陽和總制發兵

盜販粟踵至一邑獲全

馬雲駟祁縣舉人有異才性慷慨賑貧周急遠邇倚賴他鄉之困於窮途者嘗贈至數百金

馬雲駿祁縣監生張雲翼祁縣庠生俱以孝友著

楊鐵太谷人輕財好義闖寇之變鐵招逃亡男婦五百餘人藏樓中出粟食之

孟之晉太谷武舉性至孝闖賊破城母張氏投井死晉亦投井賊曳出索金拷掠不屈痛母死非命哀毀骨立

霍夢蘭榆次人順德府同知俊士子也闖賊入晉執令出家財助軍無以償夢蘭代父身受拷掠無完膚旋繫俊士夢蘭併妻子西行夢蘭隨父母慘遭險毒賴僞吏周國明保護得無恙釋歸當俊士被繫而西也其妻死賊

中乃藁葬焉夢蘭既奉父歸復往陝收母骸以歸父卒
合窆於墓

國朝

潘一桂陽曲人鶩飯事親父性好飲夜歸輒醉桂執燭候
門扶之終身不倦父歿廬墓人稱潘孝子

賈士楚陽曲人八歲喪母事父承顏順志父繼娶李氏未
數年父故事祖母馮曲盡歡心事繼母間寢視膳親嘗
湯藥無異所生馮氏壽八十有六李氏壽八十有一葬
祭胥盡禮盡哀孺慕之誠歷數十年如一日乾隆四年
旌表

李華齡字嶽生陽曲廩生事親孝父珪病延醫用珍餌父
止之華齡典衣物購參苓暗置藥中父服之寢愈

馬電太原人補博士弟子性仁厚好周人急施粟施藥施
權終其身里人劉養病篤以所積四十金托電後五年
養妻慚他適訟於官電曰是固有之第劉養遺言俟其
子婚娶乃給還今子未十歲若何縣令黃曰第與之電
卽手四十金還養妻又出四十金曰此五年子錢也黃
躍然起曰義士義士蓋電所爲類若此

劉玘臣太原人父病噎百計求愈或以割股可療從之病
果愈

冀孔增太原諸生舉優行秉性孝友父歿朝夕思慕繼母
患臆晝夜扶持弟病跋涉京師延訪名醫門內雍和無
詬諄語里中稱道勿衰

康德威太原人居心謹厚非分不爲家貧鬻飯有行客主

其家遺金一囊德威檢收默俟之明日客急遽來覓問其數相符挈還之邑合旌其門

馬勇烈太原人秉性仁孝父患癱臥床七年日侍湯藥毫無倦容及卒哀毀幾絕既葬盡禮里族咸稱其孝

王康太原舉人幼性誠篤笑言不苟師事長兄終身執弟子禮繼胞伯嗣昌後事之如生父父病三年日侍湯藥暑不解衣鄉里賢之

武珍太原人性純孝幼失怙家貧傭工以奉母怡怡色養終身勿衰母病數年醫禱備至病愈年九十餘

牛登瀛太原庠生慷慨好施村東南有古道甚隘瀛捨宅地闊坦途行人便之

楊文學太原國學生素稱長者因登瀛闢地尚狹復捨已

地廣而長之以成其美邑令吳勒石紀二人之事

周昌運榆次人明御史缺之後早孤育於祖母及長事祖母甚孝貿易京師忽心動曰祖母得母有疾乎遽歸果病篤同妻王氏禱於天以身代疾遂愈後祖母卒廬墓三年乾隆初旌表

寇鳳鳴榆次人家貧父靖好飲食鳳鳴傭工每日得百錢置父枕下以養親志終靖之世無間也

張星煜榆次儒家子竭力事父母母侯氏多病星煜刺指血書佛經祈求母壽母病果愈

李元顯太谷人少孤事母至孝母病侍湯藥親嘗而後進及卒哀毀骨立茹蔬三年

侯憲太谷歲貢事親孝敬好施嘗分財賑人鄉黨稱之

趙福太谷人性至孝父臥病親調藥餌憂形於色父性不喜紛華臨終教以勤儉治家終身克遵父訓及父歿事繼母一如事父鄉里稱之

牛志遴太谷廩生早孤事母至孝母病親嘗湯藥半載不解衣帶不茹葷嘗祝天願減已算以益親年有司旌表姜大謨太谷人家貧爲人傭計所得奉母甘旨母歿號泣踰年有司旌之

程鳳南太谷人業鹽兩淮捐餉增課力助軍需拯救災黎有司給額示獎

楊文德文命太谷人父染病臥床十二載二子藥必親嘗衣不解帶願減已算求神以代嘗服賈於外聞母病日行三百里以歸善事伯父母如其父母

馬繹祁縣國學生敦行好施歲饑易粟賑貧幼失怙事母惟謹母卒悲痛幾絕枕苫獨居者三年殯殮葬祭罔不盡禮

許釗祁縣舉人幼喪父常痛不逮養事母孝及母病狂飲食起居必躬必親二十餘年如一日

程師伊祁縣庠生克敦孝友母既葬每遇風雨必偕仲弟往哭於墓季弟尙幼撫育成立祖母病朝夕侍奉衣不解帶者兩年鄉黨稱之

程彥直祁縣人篤行勤學母卒悲號欲絕父買於陝星馳父所兩月而父亦卒扶柩歸里與母合葬盡禮盡哀遠近悅服

高爾秀祁縣人孝事繼母母病三年躬侍湯藥衣不解帶

及卒哀毀骨立葬祭盡禮兄早逝撫養子女如已出學
使旌其門

戴祚祥祁縣人兄弟五人祚祥其季也孝友性成遇諸兄
急難慨然引爲己任常立書舍延師課里黨之貧不能
讀者兩遇荒年出金粟以濟全活甚衆邑令朱舉爲鄉
介表其門

劉銳祁縣人起家勤儉不履公庭常施藥餌捐金創建橋
梁

顏儁祁縣人瀕困扶危救人之急嘗修葺學宮捐重貲竭
力經營舉鄉飲介賓

程作賢祁縣人疎財仗義輸金倡修文昌閣歲荒捐米於
公所煮飯以活人凡三閱月全活甚衆

盧應魁祁縣人力農敦詩禮事繼母能先意承志友愛兄弟睦隣恤乏里中之幼失父母無依者輒收養之

羅光碧祁縣歲貢慷慨正直義之所在不避艱險鄉人重之

梁鐸祁縣庠生恬淡冲和行敦古處事繼母克孝性好施每歲出粟以濟貧乏屢建橋梁構茶亭不可殫記舉鄉飲

李讓生祁縣人少失怙孝事孀母勤苦成家而輕財仗義本自性成從伯叔兄弟貧而死者悉爲營葬宗黨賴以舉火者十數家

薛貴祁縣人父客關東久不歸貴弱冠欲尋父因母老家貧不能遠離及母卒飲泣東行背負招狀由燕山而北

凡寧古塔烏拉墨爾根諸處無不遍歷幾及三載後至
鉄嶺八寶山酷暑苦饑餓會風雷交作僵臥梵宇簷下
山民進以水漿詢所自貴詳述以對寺內一道士側耳
傾聽拄杖而出曰是吾子也相持大痛人以爲誠孝所
感時乾隆十一年事也旣歸傭工奉養三年父歿與母
合葬邑人戴彭年爲之傳

任慧神縣人孝事繼母有弟四人皆繼母出備極友愛家
徒壁立獨嘗艱辛撫育諸弟有成邑人稱其孝友

渠錦和縣人少孤事母孝不苟取妻母卒衆爭其財錦禁
妻勿取性儉勤樂施與其子永澍亦以孝聞

程珮公和縣人幼失怙稍長克自樹立事孀母以孝聞友
愛弱弟老而彌篤敬宗族恤貧乏人無間言

張正智祁縣人少失怙事母極孝兄亦早逝遺幼姪智與妻賀氏事寡嫂如母撫育遺姪恩愛彌篤

韓煜祁縣人幼喪父事母孝弟五人皆幼煜營生養母母卒與諸弟同爨無閒言又前母姊適陳氏貧苦無資迎養於家愛敬不懈

戴孜瑜祁縣庠生少孤母病常汲甘水於十里之外風雨靡間鄉里稱其孝以服事過勞早卒妻時氏守節以終頡翼祁縣人幼喪父事母誠謹童年入泮每詢父遺事必痛哭流涕母亡後逢雙親忌日尤悲號不能自已

閻成蘭祁縣人家貧傭工後行商歸化辛苦備嘗存心好義乾隆丁卯於井陘縣漢淮陰侯背水爲陣處捐已貲命仲子監生需督工四載修大石橋十四墩車馬通行

今橋頭碑記猶存臨終復畱遺義莊丁酉橋塊圯孫庠生安邦鳩工補修並建河神廟以護之總督周公元理額於廟曰博濟延庠

梁光祖祁縣廩貢善事繼母友愛幼弟睦族恤隣排難解紛一鄉悅服

馬普雲祁縣人慷慨尚義一門之中伯叔昆季靡不爲之經理毋使缺乏庭內輯和人稱孝友

梁鉉祁縣人少孤育於伯兄及長事兄如父自奉儉約好施予爲人排難解紛揮金不吝

錢承州祁縣人慷慨仁厚出粟賑饑建橋梁往來無病涉者

張進朝祁縣人父歿時二弟尚幼朝自奉節儉毫無私殖

尋三弟早世撫遺姪三人教養成立

戴霈祁縣人好善樂施凡修建祠宇橋梁量力欣助尤善勸善規過里人欽之

頡煥章祁縣人性寡交介然自守厭繁華攜眷寓文邑西謁商山卜子廟見配殿田段二賢木主壞捐貲重雕創建神閣後值重修卜子廟復輸二百餘金適歲歉擇村中至貧者四十餘家月給米三斗所活甚衆

史開秀祁縣人生平敬老憐貧其妻梁氏連生七女因病勸夫納妾不允後買女爲夫妾秀收爲義女擇配後生三子讀書有成

康富祁縣人天性淳篤慷慨好施有閭姓者娶妻家貧不能度日爲分離計富聞之合焚離書日給薪米夫妻完

聚子福旺能繼先人志親族不能婚葬者給貲助之如
倡修本鎮北門樓鎮河樓及開渠灌地人多利賴焉

高大智祁縣人慷慨好義遇人急難匍匐往救性至孝母
寢疾三載朝夕侍奉以終母年生三子皆能繼父志

范爾寧祁縣人事繼母委曲承順從無間言弟爾靜父歿
時生甫七月賴撫育以成後失明友愛尤篤爲之授室
析居後弟有所欲悉讓焉

程履中祁縣人兄弟三人履居幼長兄早亡履以仲兄子
嗣之仲任餘姚尉尋卒履移櫬回籍復爲償債千金又
遺子女八人履爲之教養婚嫁先履無子五十餘忽生
二子人皆以爲厚德之報云

武裕理祁縣庠生秉性剛直鄉人皆矜式焉兩弟婦早寡

理撫恤尤厚臨終戒子弟曰我死無他累惟兩妾婦守節可憫汝等其善遇之

張雪鳳徐溝人八歲失母淚盡繼之以血父爲勸慰始飲食事父及繼母色養無違父病藥必躬親同臥起二十餘年

蘇曰祥徐溝人髫齡母歿哭甚哀日夜聲不絕事繼母盡孝父病衣不解帶二百日後父及繼母歿墓胥親築廬墓三年邑人將聞諸官祥力辭之順治十年縣令給額旌之

李瀛蕊徐溝人尙義好施嘗建洞渦河橋利行人又捐地構屋冬夏施茶粥

張繼仲徐溝清源鄉人父商於外年十六誓往尋之道出

關東遇猛虎以意默
子 疇虎逡巡去明年得父歸鄉稱孝

王兆龍清源鄉人有至性尚義俠父歿年甫十餘事生母
羅氏庶母閻氏委曲承順厥後羅卒閻失明事之如生
母康熙五十八年歲饑悉出家資以賑貧乏

張成德徐溝人尚義好施修橋平路
常思孔徐溝人孝友嫻睦終身樂善

陳我維徐溝人拯飢恤苦愛老憐貧

張克容徐溝人天性孝友父病二載餘延醫調治親奉藥
餌日夜不離左右

蘇進業徐溝人事親至孝有司旌其門

張雲鳳徐溝人自幼事親孺慕承歡後因父衰老朝夕侍

奉不入內室者二十餘載父歿哀毀迫切終身不飲酒
茹葷乾隆十年旌表

蘇蔭徐溝人天性篤孝九歲失恃哀痛迫切宛如成人事
繼母曲體親志不啻所生及卒居喪三年不入內室乾
隆十年旌表

李陞鳳徐溝人二歲喪父及長痛父早亡未成喪禮懷恨
終天家貧事祖父母甘旨不缺問寢視膳歷數十年如
一日祖父母俱享年八十其後家饒裕以周恤爲事里
中貧乏難於婚葬者恒沐其惠乾隆十二年旌表

董起龍徐溝人竭力事親父歿事寡母色養備至兼愛諸
弟以慰親心年七十兄弟同居生平義不苟取而施予
不吝甚有爲債所迫者龍代償之

呂弼姬徐溝人家貧親老服賈養親友愛兄弟教子義方家稍裕建合祠以祀先人族人咸被其教養

姚師閔徐溝人父早喪閔年十三家貧力田甘旨奉母蒸藿自給母病衣不解帶者兩月及卒哀痛幾絕每逢忌日輒嗚咽墮淚弟病疫家人俱避閔獨同榻調護無倦邑令旌其門

劉鳳翥徐溝庠生孝友性成侍親藥必先嘗朝夕扶持衣不解帶善能曲體親心養生送死盡禮盡哀撫弟鳳翹成立

張興盛徐溝人作養貧寒士子倡修橋梁道路有司旌之張珽徐溝人樂善好施卹孤矜寡隣里親族多沐其惠

邢邦彥清源鄉人都閩天培子天性純篤朝夕不離親側

隨任蜀中繼調征古滇邦彥隨之被鎗傷後父在金川陣亡邦彥殉之忠孝兩全

牛文友清源鄉人天性純厚篤於孝思事親曲盡子職逮母歿事繼母不異所生型方善俗舉鄉飲

牛明德清源鄉人髫齡侍父疾親調藥餌衣不解帶者月餘父歿盡禮盡哀事母益謹承顏順志年七十餘追念先人猶唏噓流涕

蘇恒清源鄉人三歲失怙事孀母奉養惟謹母病衣不解帶藥必先嘗生事葬祭盡禮盡哀雖年踰七十不忘孝思

王奠安清源鄉人郡庠生十歲母亡事繼母咸得歡心鄉人稱其孝

羅聖詣羅純詣孟立王得璽清源鄉人俱以孝友著

楊漸達交城人好義俠埋齒掩骼者累載年八十預知死期沐浴端逝

任道遠交城農家子天性純孝定省合節父母安之母歿事繼母委曲承順若不知爲異母母亦雅愛逾已子縣令爲請旌

武承甫交城人給諫攀龍之祖父也賦性醇和樂善不倦幼失怙孝於母友於兄弟周恤閭里待以舉火者甚衆歲凶出錢粟以濟貧生平樂易慈良不以睚眦相校邑人賢之從祀鄉賢

應祥文水人兄弟同爨五十載子國魁孫調鼎胥魁於鄉鄭浩文水人親老家貧力養二十年如一日傭工於外二

親繼歿哀號奔喪廬墓側焉

曹天平文水人分產俱讓諸弟弟以賈歿於外營柩歸葬諸姪幼俱教養婚娶輸助學田屍骸無主者掩埋之鄉里慕其義

陳所思文水庠生仗義疎財每集諸子戒曰爲子孝爲臣忠乃不愧聖賢不辱祖宗爾輩其勿忘子訓後次子三接登進士年八十九

張法祖文水人拾還遺金有司旌其義

王璵文水人性沉摯寡言笑四歲喪父一弟纔襁褓八歲復喪母辟踊哀泣如成人撫於叔康熙丙子領鄉薦尋弟與其婦俱卒璵哭之哀撫其二子旣授室復相繼歿璵撫膺曰吾弟卒吾延息以字厥子庶幾成立以慰吾

弟亦以報吾父母而天顧不祿吾何望哉其孝友若此
王侯度璵長子沉敏好義至性尤類其父隨父謁選赴京
朝夕不去側父病卒扶櫬還里每午夜作兒啼行路爲
之感泣邑數被水患度父曾創建義學至是被決泣曰
田舍何害斯學吾父手建吾不忍坐廢漲退鳩工落成
之度弟卒遺二子長鍾文十歲餘次鍾健纔九歲飲食
教誨比於已子二十年無倦色鍾文以拔貢官知縣鍾
健官翰林者皆度力也

王侯慶璵次子性孝謹父卒於京邸慶家居聞訃痛不欲
生柩至與兄號泣苦次淚盡繼之以血遂成悸疾及遭
母喪病大作遂卒

嚴沼文水廩生事親色養備至施藥濟人全活甚衆人有

稱貸不能償者悉焚其券

胡純文水人九歲喪父事母克盡孝道因兄少多病遂習岐黃遇貧者施藥以濟全活甚衆

胡緝文水庠生性孝友兄歿教養諸姪無異已子

趙成屏文水人性孝友父歿撫幼弟成立頻遭險皆無傷人以爲忠厚之報

劉士俊文水庠生事繼母盡孝能得歡心和睦鄉鄰人無間言

麻邦錦文水人父病奉湯藥數月不懈比歿居喪盡禮兄弟友愛有萬石家風焉

寧宏懿文水人輕財好施人有召債不能償者悉取券焚之鄉黨重其義

梁進賢文水人樂善好施捐金捨藥出粟濟貧人咸感之
陳六吉文水人幼孤好讀書喜施濟康熙五十九年大荒
出粟拯饑濟人甚衆

張定元文水人樂善好施人有借貸百緡者貧不能償鬻
女爲妾元聞之卽召其人焚其券常於通衢施茶以濟
行人

高本辰文水人篤於至性撫兄子三人如已出姪容少孤
得成進士皆本辰教育之力也

邸萃然嵐縣人順治六年雲晉叛萃帶領兵民擒獲僞官
繕備城守興嵐二縣賴以安

邸挺然嵐縣人順治九年邑饑施金粟賑之又捨義塚三
處收埋無主骸骨鄉里感頌

牛檜嵐縣人樂善不倦建修神廟俱有碑碣

劉光旭嵐縣歲貢父早喪母邱氏撫孤成立母病百藥罔效光旭割股以進母病遂愈

李大盛嵐縣人家貧糠覈自饜事父母膳必備父病篤割股和羹父食羹病寢愈

牛名士嵐縣人事父母曲盡孝養逮歿哀毀骨立殯葬盡禮同妻謝氏以雙孝旌之

甄於廷興縣人兄懷廷與邑豪趙姓隙順治元年趙率黨數百人猝至鄉人閉堡門以守趙督衆攻曰弟縛懷廷來當解圍去懷廷奮曰奈何以一人而害數百家請就縛於廷請代懷廷不聽兄弟相爭久之鄉人胥感泣不得已縛於廷下趙熟視曰非也於廷慟哭言狀趙亦感

動率衆徑去

孫天繡興縣人少豪邁嘗言道在人倫功在日用識者以爲確論歲旱出蓄米減價糶之不足請於官祈兵米平糶而以其價予兵市估以平

郭茂興縣人事繼母能得歡心居喪哀毀盡禮伯父亡所遺諸孤茂撫之成立且爲人解忿息爭鄉里重之

康貯民興縣人家貧母早歿弟殘疾父繼娶別居父病謂民曰汝多智吾不汝慮汝弟愚且疾難存活民流涕曰當竭力撫之設能致產必與均焉父卒乃迎繼母與弟同爨服賈致富爲弟娶婦生四子撫如已出繼母亦忘其非已出也民年八十其弟先亡乃召弟婦及諸姪曰吾父有命吾將且暮見先人於地下一物不均是欺父

也悉分給之

王璉興縣庠生父遭冤抑璉兄弟三人皆孩幼母孫氏忍死撫之及長同弟瓚上白其狀父冤始雪璉少魁岸有氣節時流賊徧縣璉甫十餘歲單騎往來偵探賊情而不罹於害及歸母以輕身試賊痛責之遂折節讀書髮垂白猶跪受母教母歿哀毀盡禮

孫承緒興縣歲貢凡殘疾無歸者收養之死給棺木與地而葬之窰房任民居未嘗取值凡佃地者不立約曰償與不償聽自便也與人交易價如數與之物必取其虛敗者曰此人所棄也吾不取則售者苦矣人感愧多還其餘值城北紫溝村有請緒闔地界者至觀之卽於已地退數尺立石曰以此爲界地隣愧曰吾何以獨爲小

人自取石置舊界晚年人益服其德不忍與之爭

孫振基興縣人隣邑高姓者遇難無依養之十餘年終始無懈有里人婢遺金珠滿篋基拾之候於其處卒還婢王建極興縣人家貧廢學父母卒哀毀盡禮質於陝致千金攜其半歸養其兄衣食共之兄無嗣爲撫義子以其半予弟曰羸以歸汝後弟亦致富以原貲還極極笑曰吾不卽盡予汝者恐汝爲已有而蕩之旣羸矣予不欲毫有所取以違初心由是兄弟之子皆得成立

康若璉興縣庠生性孝友年十五遭父喪哀毀成禮三兄繼歿遺孀白氏賀氏家益窘事寡嫂如母撫諸姪如子同爨數十年嫂得完其志而姪皆成立伯兄之子瞽目無養贍以已子所分地讓之鄉里咸欽其德義

王君寵興縣庠生博記多聞慷慨喜施助凡親黨有求輒應隣邑張姓者質於興負本不得歸寵予三十金不責報也康熙六十年歲歉流民載道日持錢出路賙之男女路處者僦居之減價糶米多所全活

賀聖時興縣人性孝友十餘歲時母病篤父亦病時左右奉養侍母憂甚及徃父所則變爲怡容母卒哀毀父止之輒止獨居未嘗不涕泣父繼娶先後所出六人時事繼母撫諸弟恩誼備至及父卒時爲諸弟延師拮据萬狀後兩弟相繼故時感傷成病卒

劉祖乙興縣人少孝謹年十五母卒事繼母孝敬彌篤撫諸弟飲食教誨父卒哀毀盡禮以其饒產讓諸弟鄉里稱之

劉妙岢興縣人慷慨好施與雍正丙子大饑盡出糶粟以賑族人或曰獨不爲家計乎妙曰吾力恨不能盡濟鄉人卽吾族不給寧同斃耳乾隆丁巳又饑丙子遭霜皆計口均給不足稱貸以濟旣老病且革謂子維煥曰吾族人貧歲終徃糧不可緩當代納之至後歲以爲常邑令旌之

王存益興縣人樂善好施人有急難求無不濟鄉里皆賴之事父色養備至父患癱時益已六十餘矣湯藥起居必親扶持衣不解帶者數年人稱其篤孝云

呂立德興縣人直樸有智畧少赤貧販木河東逆旅得金一囊守而還之又見夫婦號哭而婦投河者詢之夫貧鬻婦卽傾囊贖且賙之性篤孝善事繼母父卒事兄甚

恭兄卒其子蕩產

將盡德出千金與之又將盡德名其

弟出一篋示之曰

此吾爲而兄贖產約也毋令而兄知

能改分與之不攷

卽獨與若吾不忍吾兄後窮餓也

孫赴興縣人潤達伏

義少貧隨父居合查山之陽廣畜牧

墾荒田力致饒益

四方貧困者悉濟之赴行三人稱爲

三老客有攫牛馬

者過三老亦不諱赴好爲教誡或予

以金畱所攫訪其

主還之客不怨主亦不疑隣邑方數

百里無不敬三老

者